

1 Corintios

Corinto llactaibi tiyac quiriccunama Pablo cai cartata quillcasha cachan

¹ Yaya Dios munashcamanda Jesucristo japihuara pahua shimita camachigrichun nisha. Ñáuca Pablo ñucanchi quiric huauqui Sostenes nishcahuan cai cartata quillcasha cachauchi.

² Tucui canguna Corinto llactaibi tiyac Diospa runaguna muntunma cai cartata cachauchi.

Canguna Jesucristota quirishcamanda Yaya Diosmi cangunata pahuaglla causachun nisha japira. Chasnallata tucui Señor Jesucristota mañaccunaga maibi tiyaushahuas tiyanmi. Paimi cangunatas ñucanchitas jatun mandac man.

³ Cunan Yaya Dios ñucanchi Señor Jesucristohuas cangunata llaquisha mana manzharina cungailla causaita cangunama cuchun nishami tapunchi.

Ñáucanchi Señor Jesucristohuan purisha causanamanda

⁴ Jesucristomanda Yaya Dios cangunata ashcata llaquishcaraicu caran cutin pahuan cuintasha paita pagrachu nini.

⁵ Canguna Jesucristohuan shuglla tucushcamanda Dios canguna tucui causaibi yapa alita yanapashca canguna ali yuyaihuan rimangahua, tucui alita yachangahua.

⁶ Cunan canguna chasna ali yuyaihuan ali shimihuan causaunguichimi ñucanchi Cristomanda yachachishcata ali uyashcaraicu.

⁷ Chasnallata Señor Jesucristo shamusha ricurinata chapasha causaunguichimi. Chasna chapacpi Dios cangunata cushcaga mana imahuas pishingachu pai munashcata ushaihuan rangahua.

⁸ Puchucai punzhagama paimi cangunata yanapasha sinzhiyachinga. Chasna racpi Señor Jesucristo bulltiamuna punzhaibi canguna jucha illac angaraunguichi.

⁹ Caita yachanchimi Dios munashcamandami ñucanchita japira pahua churi ñucanchi Señor Jesucristohuan pariu causachun nisha. Chasnallata yachanchi paí rimashca shimi sirtu pactaringami, paita quirinalla man.

Quiriccuna chaupirisha chicanyashcanguichi

¹⁰ Tucui quiriccuna, ñucanchi Señor Jesucristo niucshinami cangunataga casna rugauni shuc yuyaillahan causaichi huauquiguna. Ama caran amu chicanda yuyarichichu randi shuc shungulahan pariu yuyarisha causaichi.

¹¹ Cunan canguna caran amu chicanda yuyarisha piñanacusha mana alita cuintanca-canguichi. Cloehua ailluguna rimahuanaaura quiriccuna chasna tucunguna nisha huauquiguna.

¹² Chasnami yachin. Maicanguna Pablota uzac manchi ninguiichi. Shuccuna Apostola uzac manchi ninguiichi. Shuccunaga Pedrota uzac manchi ninguiichi. Shuccunaga Cristollata uzac manchi ninguiichi.

¹³ Imaraicuta chasna ranguichi. Cristo chaupirishcachu an. Ñaucachu cangunamanda

cruspi huañura. Ñáuca shutihuan bautisarishcacharanguichi.

¹⁴ Canguna muntunmanda mana pitas bautisaranichu, chimanda cushiyani. Ishcaillata (2) bautisarani Crispota Gayotas.

¹⁵ Chasna acpi pihiwas rimanata mana ushanzhu ñuca Pablo shutihuan bautisarishca ani nisha.

¹⁶ Chasnallata Estéfanascunata bautisarani randi ñuca ricucpi mana mas bautisaranichu yachin.

¹⁷ Ricuichi. Cristo mana cachahuarachu bautisagri nisha, randi Diospa quishpina shimita yachachigri nisha cachahuara. Chasna yachachisha mana runa yachashca yuyaihuanzhu camachini. Ñáuca chasna yapa yachaushca shimigunahuan chapusha camachicpiga Cristo cruspi huañushcami nisha yanga anma.

Cristo alita ricuchishcami Diospa ushaitas yuyaitahuas

¹⁸ Ñáucanchita quishpichingahua Cristo cruspimi huañushca nisha yachachini. Chi ucupachama riuc mana quiriccuna chi Diospa quishpina shimi yanga man nisha yuyarinaun. Randi quirisha quishpichitucuucunaga chi shimiuhuanmi Diospa ushaita charinchi nisha yachanchi.

¹⁹ Diospa shimi unai ñaupa quillcashca nin: Cai mundumanda yapa yuyaiyuc runa yachachishcagunataga huaglichishami. Yapa yuyaiyuc agllaita paigunata pishi yuyaiyucta churashami nisha Dios nin paihua shimibi.

20 Chasna acpi caita yuyarichi. Cai mundui ashca quishpichina shimiguna tiyanzhu. Mana. Dios tucui chi shimigunata upacuinta tucunata rashca. Chi yapa yuyaiyuc runaguna, mandashcagunata yachachiccunahuas, cai mundumanda yachaccunahuas ñucanchi rimashca shimita pactachisha quishpichishca tucunguichimi nishami yanga rimaunguna. Chasna rimagllaita Dios paiguna yuyarinagunata upacuinta tucunata rashca.

21 Ñáa runaguna quiquin yuyaillahuan Diosta yachanata mana ushanaurachu yapa yachac ashallata. Astahuantas Dios sirtu yuyac asha pai chicanda quishpichingahua casna rara. Paihua quiquin shimi huan tucui runagunata quishpichinata munara. Chi shuccuna Diospa shimi yanga man nigllaita chi camachishca shimi huanmi paita quiric runagunata quishpichinata munara.

22 Israel runaguna mana-israel runagunahuas quirinata mana munanaunzhu. Israelgunaga pihuas mana rashcagunata ushaihuan ricuchi-huai ñucanchi sirtu yachangahua ninaun. Mana-israel griego runagunaga mushuc yuyaigunata yachachihuai ñucanchi mas yachangahua nin-auun.

23 Ñaucanchiga Cristo cruspi huañushcamandallami yachachinchí. Chasna yachachicpi israelgunaga cruspi huañushca runata quirinata pinganayaita man nisha mana quirinaunzhu. Chi mana-israel runagunahuas mana quirinaunzhu chi shimi yanga asha mana balicchan nisha.

24 Astahuanbas Dios japisthca runagunaga israel ashas mana-israel ashahuas casna alita yuyarinchi, Cristoga cruspi huañusha Diospa ushaiyuc actas yuyaiyuc actas alita ricuchira.

25 Runaguna ninaun Diospa yuyaiga yangami an, randi runamanda Dios yali yuyaiyuc anya. Paiguna Diospa ushai mana pactanzhu ninaun randi runamanda Dios yali sinzhi manya.

Mundu mana balichishca runagunata Yaya Dios japin

26 Cangunallata yuyarichi huauquiguna. Dios cangunata japiro pahua runaguna tucuchun nisha. Náa cangunahuacpi mana yapa yuyaiyuc runaguna tiyanaunzhu. Canguna muntunbi mana yapa amuguna, mana yapa mundu balichishca runaguna tiyanaunzhu.

27 Chasna acpi Dios runagunata japisha mana cai mundu yuyaiyuc runagunataga japiro yuyaiyuc runagunata pingachingahua. Chasnallata mana ushayuc runagunataga japiro yuyaiyuc runagunata pingachingahua.

28 Mundu mana balichishca runagunatas, mundu mana munashca runagunatas, ima mana ricuriccunatas Dios japiro mundu balichishcagunataga yangayachingahua.

29 Chasna racpi mana pihuas pahuacpi balic mani nisha alabarinata ushanzhu.

30 Cangunaga Dios munashcamandami Jesucristohuan shuglla tucushca anguichi. Jesucristo cangunamanda huañushcata quirisha Diospa yuyaitami charinguichi. Paimandami Yaya Dios ñucanchi juchata perdunasha anchuchi

man ñucanchi paihuacpi jucha illac tucuchun nisha. Paimi ñucanchi causaita Diospacpi sumacta alichiun, jucha mandashcamandas ñucanchita lugaryachin.

³¹ Chasna unai ñaupa Diospa shimibi quillcashca ara casna nisha:
 Shuc runa pai rashcagunamanda ali mani nisha
 alabarina randimanda
 Dios rashcagunamandalla cushihuan rimachun
 nin.

2

Cristo cruspi huañushcamanda camachina

¹ Ñáucaga huauquiguna, cangunahuacpi pactasha Diospa shimita camachisha mana yapa yuyaiyuc runa rimashcacuinta ni runa yachaushca shimigunahuan mana camachiranichu.

² Randi cangunahuan aushcai tucui shuc yuyarinagunata saquisha Jesucristollata yuyarisha nirani, pai cruspi huañushcallata yuyarisha causarani.

³ Ñáa cangunahuagma shamusha yapa manzharisha shungu chucchurishcashina mana sinzhicuinta shamurani.

⁴ Diospa shimita camachisha mana runa yapa yachaushca shimiuhuanzhu camachirani, mana yapa yuyaiyuc runacuinctachu, astahuanbas Diospa Samai ushaihuanmi camachirani canguna quirinauchun nisha.

⁵ Chasna camachirani canguna mana runa yuyaihuanzhu Diosta quiric tucuchun nisha randi

Diospa ushaita yachashami paita quiriccuna tucunauchun nisha camachirani.

Diospa Samaillahuanmi Diospacta yachanalla

6 Ñáa manachu Diospa yuyai an. Diosta alita yachac runagunahuanmi Diospa yuyaimanda cuintanchi. Chi shimiguna mana runahua yuyaichan, randi Diospa yuyai man. Diospa yuyaiga mana cai pachamanda runahua yuyaicuintachu, chasnallata mana cai pachata mandaccuna yuyaishinachu. Chi amuguna munduibi causashcahuasha manachu tucurinaunga.

7 Callari uraspas, mundu mana tiyashca urasllata Yaya Dios ñucanchita quishpichingahua yuyarishcami ñucanchi paihuan ali causanauchun nisha. Ñáupa paihua yuyai pacashcacuinta ara randi cunanga chita yachasha cuintanchi.

8 Cai pachata mandaccuna Diospa yuyaita mana intindinaurachu. Paiguna yachashca ashaga tucuita mandac sumac Señor Jesusta cruspi mana huanchinaunma anaura.

9 Chasna acpi Diospa shimibi unai ñaupa quillcashca casna nisha:
Diosta llaquic runagunama pai yapa ali charishcata cungami.

Cunangama pis ñahuihuan mana chita ricushcachu,
rinrihuan mana uyashcachu,
shungüibis mana yuyarishcachu
pai cungaraushca yapa ali ashcamanda nisha quillcashcami.

10 Chasna agllaita Yaya Diosca paihua Samaita ñucanchi shungüibi churacpi paimi ñucanchima

cungaraushcata yuyachin. Ñáa Diospa Samaiga mana yachaibaccunata yachasha Yaya Dios quiquin yuyariushcata tucuita yachan.

11 Ñáa shuc runa shucpa yuyarishcata mana yachanzhu, amullami yachan. Chasnallata Diospa Samailla Dios yuyarishcagunata alita yachan.

12 Yaya Dios mana mundu yuyaita ñucanchima cushcachu. Randi Diospa Samai yuyachishc-ahuanmi, Yaya Dios ñucanchita llaquisha cumbirashcagunata yachanata ushanchi.

13 Chasna ashami Diospagmanda yachachisha mana runa yachaushca shimihuanzhu yachachinchii. Astahuanbas Diospa Samai ñucanchita yachachishca shimigunataga yachachinchii. Chiraicu Diosta ali yachauc runagunahuan sirtu Diospagmanda yuyarishcata yachachinchii.

14 Mana quiriccuna Diospa Samaita mana charisha pai imata yuyachishcatas mana uyanaunzhu, yanga shimi man nisha mana imatas intindinaunzhu.

15 Astahuanbas Diospa Samaita charic runagunaga tucuita ricusha ali ashcatas mana ali ashcatahuas yachaungunami. Chasna acpihuas paiguna rashcagunata ricupihuas paiguna shungu ucui ashcata chi mana quiriccuna mana yachanata ushanaunzhu.

16 Ñáaupa uras Diospa shimibi casna quillcashca an:

Diospa yuyaigunata pita yachan,
Diosta yachachinata pita ushan nin.

Chasna agllaita ñucanchiga Cristota quiriccuna
asha Cristo yuyarishcagunata yachanchi.

3

Diospacta rauc runaguna pariu ashcamanda

¹ Ñáuca cangunahuan tiyashca uras Diospa Samaita uyauc runagunata rimashcacuinta mana usharanichu cangunahuan chasna rimangahua huauquiguna. Astahanbas canguna aicha munashcata raucuna ashcaraicu Cristota mana sinzhi quiriccunatacuinta cangunata rimarani.

² Ñáa llullu huahuagunaga sinzhi micunata mana micuc asha chuchullahuan causaungunami. Chicuintallata canguna sinzhi yachachishca shimita chara mana uyac acpi ansa yachachinata cuintarani. Cunangama canguna chara sinzhi yachachishcata uyanata mana ushanguichichu.

³ Chara aicha munashcata raucuna anguichi. Pariu mana alita yuyarisha mana alita rimasha chican chican tucushcanguichi. Chimanda yachanchi aicha munashcata raucuna anguichi, Diosta mana quiric runacuinta puriunguichi.

⁴ Maicanguna ñucanchi Pablo runa manchi ninguiichi, shuccuna ñucanchi Apolospa runa manchi ninguiichi. Canguna chasna rimasha manachu camba aicha munashcata raunguichi.

Canguna Diospa chagracuinta anguichi

⁵ Yuyarichi. Pitán Pablo. Pitán Apolos. Ñaucanchiga Diosta sirbic runalla manchi. Pai caran runa tarabanata cushcacuinta chillata

raranchi. Chasna acpi ñucanchi Diospa shimita camachiipi manachu Cristota quiriranguichi.

⁶ Ñaucaga Diospa shimita camachisha muyuta tarpuccuinta arani. Apolosca chi tarpushcagunata cuiraccuinta asha cangunata mas yachachishca. Randi Diosca chi muyuta huiñachisha mirachishca.

⁷ Tarpuc runa, muyuta cuirauc runahuas manachu yanga an. Dioslla huiñachic ashcamanda tucuita rauc man. Paillata yuyarichi.

⁸ Tarpuc runas muyuta cuirauc runas pariu aunguna. Chasna agllaita caran amu rashca tuputa Dios pagashcacuinta cungami. Paiguna ali tarabashca acpi Dios alita pagangami.

⁹ Ñaucanchihuas Apolospas Diospacta rasha paihuau pariu tarabaccuna anchi. Ñáa canguna shungüibi Dios tarabacpi pahua chagracuinta anguichi.

Canguna Diospa huasicuinta anguichi

Chasnallata huasicuinta anguichi. Diosca pahua munaita cangunahuacpi rasha huasita shayachishcacuinta ran.

¹⁰ Jesucristota quirinamanda cangunata camachingahua callarirani canguna ali huasicuinta tucuchun nisha. Dios ñucata llaquisha ali yuyaita cuhuashcaraicu huasita punda shayachic runacuinta mani, huasha shuccuna Diospa shimita mas yachachisha chi huasita mas jahuamacuinta shayachisha riunguna. Caran yachachic runa alita yuyarisha yachachinauchun.

11 Ñáa pundaga Jesucristomi, pai punda sinzhi istandicuinta acpi shuc illanmi. Mana pihuas shuc punda istandita churanata ushanzhu.

12 Huasha chi huasita shayachic runagunaga caran shuc ali sinzhigunahuan baliccunahuan shayachinata ushanaun, curihuan cullquihuan rumihuancuenta. Maicanguna mana alita shayachinaun mana unaita durana ruyahuan, chindahuan, yanga pangahuancuenta shayachinaun. Chicuinta Diosmanda yachachinata camachisha maicanguna ali yachachinaun, maicanguna mana ali yachachinata yachachinaun.

13 Randi puchucai punzha pactacpi caran amu rashcaguna ricuringami. Chi punzha Diospag-manda nina tucui rashcagunata rupachisha camangami ima tunu acta ricuchingahua.

14 Maican runa mana rupaibag huasita shayachishcacuenta rasha chi alita rashcagunamanda alita pagaitucungami.

15 Chi mana alita shayachic runaga ninamanda quishpingami randi pai rashcagunaga rupashca tucusha mana imahuas puchungachu.

16 Yuyarichi. Manachu yachanguichi Diospa Samai cangunahuacpi causaun. Chasna causashcaraicu Yaya Diospa huasi manguichi.

17 Maican runa Diospa huasita huaglichicpi Dios chi runata huaglichingami. Chasna rangami paihua huasi yapa ali sumac ashcaraicu. Ñáa cangunaga Yaya Diospa quiquin causana huasi manguichi.

Diospagmanda yuyaita yachaichi

18 Cangunallata ama umasha pandaringuichichu. Canguna cai mundu yachachinata yapa yachashcaraicu yapa yuyaiyuc manchi nisha yuyarisha pandaringuichi. Astahanubas cai mundumanda yachaita saquichi Diospagmanda ali yuyaита yachangahua.

19 Diosca nin cai mundumanda yuyai paihuacpi yanga man. Paihua shimibi quillcashcami casna nisha: Paiguna quiquin yuyarinagunahuanlla Dios chi yuyaiyuc runagunata muduyachingami.

20 Chasnallata israelgunata mandac ñaupa causac rey amu David chicuinta quillcashcami: Jatun Diosca chi yachaucuna yuyarinaguna yanga manaun nin.

21-22 Chiraicumanda maican canguna ñuca Pablohua runa mani nishaga, ñuca Apolospa runa mani nishaga, ñuca Pedrohua runa mani nishaga yanga yuyarishcanguichi, tucui ñucanchi runa ashcaraicumanda. Runa acpi ama ñucanchita yapacta balichichichu. Randi casna yachaichi, llambuguna tiyanchimi cangunata yanapangahua. Ñáucahuas Apolohuas Pedrohuas, cai munduhuas, causaibas huañuibas, cunan tiyanahuas huasha tiyanahuas, tucui imahuas cangunahuagmi aunguna cangunata yanapangahua.

23 Chasnallata cangunaga Cristohuac manguichi, Cristoga Yaya Diospac man.

4

Dios cachashca runa tarabana

1 Casna tucui runaguna ñucanchimanda yuyarini-
nami anaun Jesucristota yanapac runa anauta.

Cristo cachashca runaguna anchí Diospagmanda unai ñaupa mana yachashcagunata yachachin-gahua.

² Chasna shuc cachashca runa paita mandac runa rimashcallata pactachinami, manachu.

³⁻⁴ Ñáuca pactachicpi mana pactachicpiga ñucanchita mandac amu Señor Jesus yachan. Canguna shuccunas ñucamanda imatahuas yuyaricpi ñucahuacpi mana imaschu. Ñáucallatahuas mana amuta yuyarinichu. Cunan ñuca causaibi ima jucha rashcata mana tupanichu, chasna ashallata ñuca ali mani rimanata mana ushanichu. Dioslla ñucata yachan.

⁵ Señor Jesucristo shamungamiraun, ña paí pactamusca uras tucui pacalla rashcagunatahuas tucui shungüibi yuyarishcagunatahuas ricuchingami. Chi punzhagama ama camba shungu ucui yuyaringuichichu chi runa mana alita rashca nisha. Caran amu rashcamanda Diosllata rimangami yapa alita rashcangui nisha ashillata rashcangui nisha rimangami.

⁶ Ñáucamandas Apolosmandas rimashcani huauquiguna, canguna imasna ranatas yachanauchun nisha. Canguna shuc yachachic runata balichisha shucta mana balichisha ama chaupichishcacuinta chicanda ranguichi, astahanbas Diospa shimibi quillcashcallata yuyarichi.

⁷ Cangunaga tucui shuc runacaintalla anguichi, tucui can charishcagunataga Dios cushcami. Dios canda cushcaraicumi imahuacta camballata yuyaringuichi ñuca shuccunamanda yali balic mani nisha alabaringahua.

⁸ Manachu yuyariunguichi pacta yachanchi, tucuita charic anchi nisha, mana Pabloguna yanapacpihuas yali manchi nishachu yuyariunguichiya. Canguna sirtu mandac amu tucushca acpiga ali anmaya. Chasna ashcaibiga ñucanchihuas cangunahuan pariu mandanata ushanchima.

⁹ Jesucristo ñucanchita japisha camachigrichun nisha cachashca runa ashallata runagunahuacpi mas ucuma anchi. Culpayachishca huanchina runagunatacuenta Dios rahuashca yachin llambu runaguna ñucanchita pugllangahua. Chasna tucushcanchi runagunahuacpi angelgunahuacpihuas.

¹⁰ Ñáucanchi Cristomanda shimita camachishcaraicu mana yuyaiyuc anguichi nisha ñucanchimanda rimaunguna. Astahuuanbas cangunaga Cristohuacta yapa yachanchimi nisha yuyaringuichi yachin. Ñáucanchiga api sambacuenta anchi, cangunaga ushayuc auchi nishachu yuyaringuichi. Canguna balichishca anguichi, ñucanchi randi mana balichishca anchi.

¹¹ Tucui uras ñucanchi micuna pishin, upinahuas pishin, churanahuas pishin. Ñáucanchita piñasha yapa macanaun. Huasiwas illac asha maibihuas puñunchi.

¹² Ñáucanchi maquihuan sinzhita tarabasha turmintarinchi. Runaguna ñucanchimanda mana ali shimita rimanaupi randi paigunamanda Diosta mañanchi paigunata alita rachun nisha, ali shimihiuan cutipanchi. Paiguna ñucanchita yapa turmintachinaupi randi ñucanchi ahuantanchillami.

¹³ Ñáucanchimanda llullacpiga mansu shimihiuan

rimanchi. Ñáucanchita jiridsa basura actacuinta yuyarinaun, cunangamas paigunahuacpi jichunnalla anchi.

Ñáuca canguna yayacuinta ani

14 Caita mana quillcanichu cangunata pingachingahua randi ñuca llaquishca huahuagunatacuinta cunauni.

15 Ñáucami chi Diospa quishpina shimita rimasha canguna quirinauchun nisha yachachirani. Chasna canguna Jesucristota quirishcaibi canguna yayacuinta tucurani. Yapa ashca shucuna Jesucristomanda cangunata yachachigllaita chunga huarangata (10.000) charicpihuas ñucalla canguna yayacuinta mani.

16 Chiraicu ñuca causashcacuinta causaichi nini.

17 Canguna chasna causangahuaca Timoteota cangunahuagma cachauni. Pai Señor Jesusta alita quiric man, ñuca llaquishca churicuinta man. Ñáuca imasna Cristohuan causaushcata, ñuca imasna caranbi tucui quiriccunata yachachishcatas, pai cangunata cuti yuyachingami.

18 Maican runaguna amullata yuyarisha ñuca yali ani nisha rimaccuna Pablo manzharisha mana caima pasiangahua shamungachu nisha rimanaun.

19 Astahuanbas Dios munacpi mana unayasha cangunahuagma shamunata munani. Ñáuca shamusha paiguna ñucanchi yali ushanchi nisha rimashcata yachashami sirtuchu ushaihuan imatahuas rashcata yachashami.

²⁰ Diospa ali mandanai auc runagunaga mana rimashca shimigunallahuan causanaunzhu randi Diospa ushaihuan causaushcata ricuchinaunmi.

²¹ Chasna acpi imatata yuyariunguichi. Canguna alita yuyaricpiga ñuca shamusha llaquishc-ahuanmi cangunata ali mansu rimanata ushani. Randi canguna mana cambiasha causaucpi ñuca cangunata libachishcacuinta sinzhita rimashami. Maicandata munanguichi.

5

Ashiyana yapa mana alichu

¹ Cangunahuacpi shuc runa yapa jiridsata rashcami pahua yaya huarmihuan ashiyasha nishcami nin. Chi tunu juchata chi mana quiriccunas mana rashcaunachu.

² Chi jucha tiyacpis chara ali manchi ninguiichichu. Chasna rimana randimanda yapa llaquirina manguichi. Chimanda chi juchata rac runata cangunahuagmanda anchuchinami.

³ Ñáuca mana chibi tiyaushallata randi ñuca chibi aushcacuinta chi runa jucha rashcata yachasha, paita cangunahuagmanda cachanami nini.

⁴⁻⁵ Canguna ñucanchi Señor Jesucristo shutihuán tandarishcai ñuca cangunahuan tiyashcacuinta, Señor Jesucristo ushaihuan chi runata Satanas japichun nisha rimaichi pahua aicha munai-guna chingaringahua. Chasna racpi Señor Jesucristo shamushcaibi pahua causai quishpishca tucungami.

⁶ Canguna yapa ali manchi nisha alabarishallata mana balinzhu cangunahuacpi jucha

tiyashcaraicu. Manachu rimanaun ashicua putasyachishcaga intiru panda putasyachin. Juchaga chi ashicua putasyachishcacuinta intiruta huaglichin.

⁷ Chasna acpi rucu putasyachinashina juchayuc rucu causaita jichusha illacta jichuichi mushucta rashcacuinta tucungahua. Quiriccuna sirtu mushuc yuyaiyuc anchi. Cristoga pascua punzha Diosma ricuchina ovejatacuinta huanchishca an ñucanchimanda juchata anchuchingahua.

⁸ Chimanda ñucanchi pascua jistata rashcacuinta mushuc yuyaiyuc asha alita causanami anchi. Tucui jucha ranaguna tucui jiridsa yuyarinaguna auruyashca mana upibac asuacuinta man. Ama chasna causanguichichu. Randi ali asua accounta ali yuyaihuan sumacta causanami anchi mana llullasha.

⁹ Chi ñaupa cangunama quillcashca cartaibi cangunata rimarani ashiyasha causaccunahuan ama puringuichichu nisha.

¹⁰ Cai munduibiga tucui mana quiriccunaga manachu juchata rausha causaunguna. Manachu ashiyaccuna, cullquita yapacta munaccuna, shuhuaccuna, shuc dioscunata caticcunas aunguna. Mana rimanichu chasna puriccunahuan ama rimaichichu nisha. Paigunahuan mana cuintana acpiga cai mundumanda llucshinguichimami. Chita mana rimanichu.

¹¹ Randi caita rimani, shuc runa ñuca Jesuspa runa mani niushahuas ashiyasha causacpiga ama paíhuan puringuichichu. Chi ashiyasha causac runa, cullquita munasha mitsac runa, shuc diosta catic runa, jiridsata rimac, llullac, machac,

shuhuac, tucui chicuinta rasha causaccunahuan ama puringuichichu. Jesusta quiric mani nishallata pai chasna causacpi ama paihuau micunguichichu.

12-13 Mana quiric runa jucha rashcagunata mana taripanichu. Diosmi paigunata taripanga. Canguna randi quiricpura mana ali causauta ricusha yachashami taripanami anguichi. Chiraicu Diospa shimi rimashcacuinta chi ashiyasha causac runata cangunahuagmanda anchuchinami anguichi.

6

Quiriccunapura alichinamanda

1 Quiriccunapura piñanacucpi ama amuhuagma risha alichinachun nisha amu mana quiric ashcaraicu. Astahuuanbas quiriccuna ñaupagllaita alichinami anguichi.

2 Yuyarichi. Puchucai punzha tucui munduibi tiyac runaguna juchata rashcagunata yachashami quiriccunaga alita taripangaunami. Tucui munduta canguna taripangaraushaga manachu ushanguichi cunan uras cangunahuacpi ashillagunata alichinata.

3 Chasnallata angelguna imasna rashcatas yachashami taripangamirauchi. Jahuapachaibi rashcagunata taripangaraushaga imaraicutu mana ushanguichi cunan uras munduibi rashcagunata alichinata.

4 Chita rangaraushcata yachasha cangunapura ima piñanacushcagunamandas alichina acpi

imahuacta mana quiric runahuacpi alichishun nisha ringuichi.

⁵ Chitaga rimani cangunata pingachingahua. Cangunahuacpi manachu tiyan shuc yuyaiyuc runalla quiric huauquipurata alichingahuaca.

⁶ Shuc quiric runa pahua quiric huauquita piñasha imahuacta shuc mana quiric amuhuagma ringuichi alichishun nisha.

⁷ Piñanacusha amuhuagma caudsayachingahua rishaga cangunapura mana alichinata ushac aucunata ricuchinguiichi. Chasna racpi manachu pingarinalla. Shuc quiric huauquita binsina randimanda mas ali anma can ahuantasha binsitucupi, quichuitucupihuas.

⁸ Astahuanbas cangunapurami mana alita raunguichi, pariumanda shuhuanguichi, quiricpura ashallata.

⁹ Manachu yachanguichi mana alita raucuna Diospa ali mandanama mana yaicungachu. Amullata ama llullaichichu. Llambu juchata rasha puriucuna, yanga diosta mañaccuna, ashiyaccuna, caripura llutariccuna,

¹⁰ shuhuaccuna, cullquillata yuyariccuna, machaccuna, camisha llullaccuna, umasha ganaccuna, pihuas chasna rasha causaccuna Diospa ali mandanaibi mana yaicungachu.

¹¹ Cangunahuacpis maicanguna ñaupa chasna rasha causaranguichi. Cunanga juchamanda maillashcacuinta limpio anguichi, camba shungu camba yuyaihuas aliyashcacuinta mushuc tucushcanguichi Diospacpi ali sumac. Señor Jesucristo shutihuan Diospa Samaihuan ña lugar anguichi ñucanchi Diospa runa tucushcamanda.

Ñáucanchi aichahuan ali causanami

¹² Ñáuca lugar asha ima munashcatas ranalla nisha maicanguna rimanaun. Chasna agllaita mana tucui munashca ranaga ñucanchi ali causangahua yanapanzhu. Tucuita ranata ushashallata lugarta mana cunichu ima ranahuas ñucata mandasha binsichun nini.

¹³ Chasnallata rimanaun, Micuna illacpi huicsa mana balinzhu, chasnallata huicsa illacpi micunas mana balinzhu ninaun. Diosca ña ishcandita (2) chingachisha tucuchingami. Ñáucanchi aichaga balinmi Señor Jesuspacta rangahuaca. Chiraicumí ñucanchi aichahuan mana ashiyanachu. Señor Jesusca ñucanchi aichata mandac amumi an.

¹⁴ Señor Jesusta huañushcamanda cuti causachic Yaya Diosllata paihua ushaihuan ñucanchitahuas cuti causachingami.

¹⁵ Tucui ñucanchi aichagunata Cristo japisthcamí pahua quiquin aicha tucuchun nisha. Chita manachu yachanguichi. Ñáuca aichaga Cristohua aicha ashcaraicumi imasata ashiyanata ushani. Manapacha, chasnata mana yuyarinachanchi.

¹⁶ Manachu yachanguichi shuc runa shuc ashiyachic huarmihuan llutarisha paigunapura shuc aichalla tucunaun. Chimanda Diospa shimibi quillcashca ara, ishcaiguna shuc aichalla tucunaungami.

¹⁷ Chasnallata ñucanchi Señor Jesucristota quirisha shuc shungucuinta tucusha pahuan shuglla tucunchi.

¹⁸ Chasna acpi ashiyanamanda miticusha callpaichi, ama chasna ranatahuas yuyarichichu.

Shuc jucha ranaguna aichata mana huaglich-inzhu ashiyanacuenta, randi runa ashiyasha amullata pahua quiquin aichataga huaglichin.

¹⁹ Manachu yachanguichi Diosmi pahua sumac Samaita cangunama cura. Diospa Samai camba shungu ucui causashcaraicu camba aichaga pahua huasi man. Quiric asha ñucanchi aichaga mana ñucanchihuacchu.

²⁰ Jesuspa rahuaihuan randishcaraicumi ñucanchi aichahuas ñucanchi shunguhuas Diospaglla anaun. Chasna Diospac asha ñucanchi aichahuau juchata mana ranachu, sirtu chihuan Diosta balichinami anchi.

7

Huarmita carita japinamanda

¹ Alimi. Cunanga canguna ñucata quillcascha tapushcagunata cutipashami. Maican runa huarmita mana japicpiga alimi.

² Randi runa ashiyanata yapa yuyarishcama manda caran runa pahua quiquin huarmita japhisa causanami. Huarmiga chasnallata pahua quiquin carita japhisa causanami.

³ Shuc runa pahua quiquin huarmihuau llutarinami mana mitsasha. Chasnallata shuc huarmiga pahua quiquin carihuan llutarinami mana mitsasha.

⁴ Huarmi aichaga mana huarmihuagllachu astahuanbas pahua carihuac man. Chasnallata cari aichaga mana amuhuagllachu randi pahua huarmihuac man.

⁵ Cangunapura ama mitsanacunguichichu. Canguna ishcandipura Diosllata yuyarisha

mañananata munasha ansa punzhallata ama pariu puñunguichihu, chihuasha cuti llutaringuichi. Unaita mana llutaricpiga Satanas cangunata juchaibi urmachingami canguna ahuantanata mana ushashcamanda.

⁶ Alimi. Caita quillcashash runaguna ama shucta japichichu nisha ñuca mana mandanichu. Canguna pariu japicpiga ali man.

⁷ Chasna agllaita caita nini, tucuiguna ñucacuinta huarmi illac causacpi alichari anaunma. Randi Dios caran tunu causanata cushcami, maican runa japinatas, shucca mana japisha ahuan-
tanatas.

⁸ Chara sapalla causaccunamas huaccha huarmigunamas shuc shimita charini yachachingahua. Canguna ñucacuinta sapalla asha causasha ali anguichima.

⁹ Randi sapalla puringahua mana ahuantanata ushashaga jipinacuichilla. Pai jipina huarmita ashiyana randimanda alita jipinacuna yali ali anma.

¹⁰ Randi jipinacushcagunata rimani, cariyuc huarmiga paihua carita mana jichunachu. Chi shimiga mana ñuca mandashca shimichu randi Señor Jesucristomi chita mandara.

¹¹ Randi pahua carita jichushaga ama shucta jipichun, pai shucta japisha nishaga pahua quiquin carihuan alichisha cuti pahuan causachun. Shuc runaga chasnallata pahua huarmita ama jichuchun.

Quiricca mana quiricta charishcamanda

¹² Chi shuccunama caita rimani, Señor Jesus mana mandashcachu randi ñuca yuyaimanda

caita nini. Shuc quiric runaga paihua huarmi mana quiric ashallata pahuan causasha nicpiga ali manga, pahua huarmita ama jichuchun.

¹³ Chasnallata, quiric huarmiga pahua cari mana quiric ashaga pahuan causasha nicpi ali man, pahua carita ama jichuchun.

¹⁴ Chi huarmiga ama yuyarichun cai mana quiric runahuan causasha Dioshuan mana ali tucuni nisha. Randi huarmi quiric ashcaraicu pahua cariga pahuan causasha Dioshuan ali tucunata ushang. Chasnallata quiric cari mana quiric huarmihuan causashcaraicu mana alihu tucuni nisha ama rimanguichu. Randi pai quiric ashcaraicu pahua huarmiga pahuan causasha Dioshuan ali tucunata ushang. Chasnallata pahua huahuaguna Dioshuan ali tucunata ushanaunga. Mana chasna acpiga chi huahuagunaga mana quiricpa huahuagunacuinta tucunaungami.

¹⁵ Mana quiric cari ashas mana quiric huarmi ashas llushpirisha nicpiga llushpirichun. Chasna llushpiricpi saquishca runaga saquishca huarmiga mana huatashcacuinctachanga chi mana quirighuan angahua. Náucanchi piñanacusha causanata Dios mana munanzhu.

¹⁶ Huarmi pahua cari quishpichitucunmachari mana yachanzhu, cariga pahua huarmi quishpichitucunmachari mana yachanzhu. Chasna mana yachasha quiricca mana llushpirichun.

Jesucristota quirisha lugar runa anguichi

¹⁷ Alimi. Tucui quiric muntungunama caita mandani. Maican runa Señor Jesusta quirishca

punzhai ima tunu runa ashcasha chi tunulla purichi, Yaya Dios paita rashcacuinta causachun.

¹⁸ Quirishca uras maican runa israel runa ashaga ama cambiasha nichun randi israel runa achun. Shucca mana-israel ashaga israel runacuinta pitishca tucunata ama yuyarichun.

¹⁹ Israel runa ashas mana-israel runa ashahuas ama chita yuyaringuichichu, mana imaschan. Dios mandashcagunata pactachisha yuyarinal-lami anguichi.

²⁰ Caran amu quiric tucusha ñaupa ashcacuinta causachun.

²¹ Quirishca uras huatashcacuinta amuyuc runa acpihuas ama chimanda llaquirichu. Randi llushpirinata ushashaga llushpirilla.

²² Canguna lugar ashas, mana lugar ashahuas, caita yuyarichi, maican runa quirishcai huatashcacuinta amuyuc ashaga cushiyachun pahua juchamanda Jesucristo lugaryachishcaraicu. Mana amuyuc runaga quiric tucusha ña shuc huatashca runacuinta Jesucristohuacta rac runa tucunmi.

²³ Jesucristo yapa turmintariura cangunata lugaryachingahua. Canguna pahua balic rahuai-huanmi randishca ashami mana shucpa runa tucunguichichu.

²⁴ Chasna acpi quiric huauquiguna, canguna quirishca uraspi imaibi ñaupa causac asha chicuinta causaichi, randi Diosta quirishcahanmi purichi.

Imasna Señor Jesusta yuyaringuichi

²⁵ Mana cariyuc huarmi ranagunamanda cu-nan rimasha. Señor Jesus caita mana mandarachu

randi pai ñucata yuyarisha yanapashcamandami canguna ñuca rimashcataga uyacpi ali man.

²⁶ Cunan ñucanchi yapa turmintariushcai causaushcaraicu canguna mana japinacusha causacpi ali anma.

²⁷ Huarmiyuc ashaga camba huarmita ama jichunguichu. Mana huarmiyuc ashaga huarmita ama mascanguichu charingahua.

²⁸ Canguna japisaga mana juchata raunguichichu. Chasna agllaita japinacushcagunaga cai mundui yapa turmintarinata tupangaunami. Chi llaquigunata ama apachun nisha munani.

²⁹ Chasna agllaita caita cangunama rimani huauquiguna. Turmintarina punzhaguna mana ashca punzha pishinzhu, ñia tucuriunmi. Chita yachasha cunanmanda ñaupagma huarmiyuc runaga ama paihua huarmillata yuyarichun astahuuanbas Diospagmanda yuyarisha causanami.

³⁰ Chasnallata llaquirisha huacac runaga ama chi llaquirishcata yuyarishalla causana anguichi. Cushiyac runaga ama chi cushiyashcata yuyarishalla causana anguichi. Cai pachai randishca charishcagunata ama yuyarishalla purina anguichi.

³¹ Chasnallata cai pachai ali causangahua ama chigunata yuyarishalla tarabana anguichi. Tucui cai pachai tiyaccunaga tucurinallami.

³² Chiraicu canguna cai causaimanda mana yuyarishachu lugar causachun nisha munani.

Chasna acpi mana huarmiyuc runaga Señor Jesussta yuyarinmi, paita cushiyachinata munanmi.

³³ Randi huarmiyuc runaga cai causaimanda yuyarinmi paihua huarmita cushiyachingahua.

³⁴ Paihua huarmitahuas Diostahuas ishcandida (2) cushiyachinata ñalla mana ushashaga chicanda yuyarisha causan. Chasnallata cariyuc huarmiga paihua carita cushiyachinata yuyarisha causan. Mana cariyuc huarmiga randi Diosta yuyarinmi paihua aichahuan paihua yuyaihuans Diospacpi ali causangahua.

³⁵ Tucui chigunata rimani cangunata yanapan-gahua. Mana cangunata turmintachingahua ri-manichu randi canguna tucui yuyaihuan Señor Jesusta cushiyachisha causachun nisha munani.

³⁶ Maican runa pai tapushca huarmihuan mana ali puriucpi pai mas rucuyaushcata ricusha japi-nacushun ali anma nisha japi-nacuchun. Chiga mana juchachu.

³⁷ Chasnallata maican runa mana jiplina ashaga, ña mana japiشا nishahuas, paihua aicha munashcata mandanata ushashaga pai yuyarishcashina mana japiشا chasnallata alita ran.

³⁸ Maican runa japiشا alita ran, maicanga mana japiشاahuas mas alita ran.

³⁹ Huarmiga pahua cari huañunagama pahuan pariu causanami. Pahua cari huañucpi lugaryan, shucta japiñata ushanmi chi runa Señor Jesusta quiric acpi.

⁴⁰ Randi ñuca ricucpi pai sapalla ashaga mas cushi causangami. Chasná ñuca yuyarishcata ri-mani, Diospa Samaihuas ñuca ricucpi chasnallata yuyarin.

8

Micunata yanga dioscunata ricuchishcamanda

¹ Alimi. Cunan ña cuintangarauni yanga dioscunata ricuchishca aichamanda. Maican Jesucristota catic runaguna ñupa chi aichata micuc asha ninaun ñucanchi tucuita ali yachashcaraicu chita mana sasinata minishtirinchichu, chasna micusha Diospacpi mana huaglishca tucunchichu nisha. Yachanaga amuta alabarichisha shuccunatas mana yanapanzhu, randi llaquinaga shuc quiric runata yanapan mas sinzhi quiric tucuchun nisha.

² Pihuas ñuca yachanimi nisha yuyarishaga chara pishin tucuita yachanata.

³ Chasna agllaita Yaya Diosta shungumanda yuyaric runata Dios alita ricsin.

⁴ Chasna acpi yanga dioscunata ricuchishca micunata micusha nisha caita yuyarina manchi: Yanga dioscuna mana causaita charinata yachanchi, chasnallata yachanchimi shuc causac Dioslla man.

⁵ Chasna acpihuas cieloi cai allpaibihuas runa alabashca ashca dioscuna tiyacpis yanga man-aun. Sirtu ashca tiyaungunami dios nishcaguna runa balichishcagunahuas.

⁶ Chasna paiguna ashca tiyaunguna nigllaita yachanchimi shuc Dioslla tiyanmi, paiga ñucanchi yayami. Paimi tucuigunata rara, ñucanchitahuas rara pai munashcata rachun nisha. Chasnallata shuc mandagllami tiyan, paiga Señor Jesucristomi. Paimi tucuigunata rashca aunguna, ñucanchihuas pahua ushaihuan causanchi.

⁷ Chasna acpi yanga dioscunama ricuchishca aichaga micunallami, randi mana tucui quiriccuna chita yachanaunzhu. Paiguna yanga dioscunata ñaupa caticcuna asha cunan yanga dioscunama ricuchishca aichata micushaga paihua yuyaibi turbarisha rimaunguna chita micushcamanda ñuca causaita ña huaglichishcanimi nisha, culpayuc tucushcani.

⁸ Yuyarichi. Chi micunata micucpiga Dioschu ñucanchita rimanga canguna mas ali anguichi nisha? Mana. Náucanchi micushaga chi micunahuan mana mas ali tucunchichu, mana micushahuas mana pishitucunchichu.

⁹ Can micunata munashaga micuilla, lugarmi angui. Randi shucta ama pandachingahua yuyarichi. Shuc mana sinzhi quiric runaga can micuushcata ricushaga pahua shungu ucui culpayashcacuinta tucun.

¹⁰ Ricuichi. Can sirtu Diosta quiric ashaga shuc yanga diospa huasima risha micuushcata shuc quiric huauqui chibi canda tupanma. Pahuas, pahua yuyai turbarillaita cancuinta rasha yanga diosta ricuchishcata micunma.

¹¹ Chasna tucupi can ali yachani nishallata chi mana sinzhi quiric huauquita Cristo huañusha quishpichishca acta huaglichishcangu.

¹² Camba mana sinzhi quiric huauquita chasna huaglichisha Cristohuacpis mana alita rasha juchata rangui.

¹³ Chiraicu ñuca micushcaraicumanda shuc quiric huauquita mana alita rachishaga ima uraspas aichata mana micushachu nini ñuca paita mana pandachisha juchai urmachingahua.

9

Jesucristo cachashca runa mani

¹ Ñáucaga Jesucristo japišha camachigrichun nishca cachashca runa asha chi shuc camachic runagunacinta ranatas lugarta charini. Ñáucahuas ricushcani ñucanchi Señor Jesusta. Cangunaga ñuca camachishcata uyasha quiric tucusha Señor Jesuspacta ñuca rauctaga ricuchic anguichi.

² Shuccuna ñucamanda rimasha paiga mana Jesucristo cachashca runachan nisha, rimagllaita cangunaga ñuca yachachishcamanda quiric tucusha tucui runagunama ricuchinguichimi ñuca sirtu Cristo cachashca runa ashcataga.

³ Tucui ñucamanda pai mana Cristo cachashca runachan nisha rimac runagunata caita rimani,

⁴⁻⁶ Tucui Diospa shimita camachingahua cachashca runaguna puriusha paigunama cushca cullquihuan causaunguna. Ñáuca Bernabendi randi ñucanchi maquihuan tarabasha causaunchi. Ñáucanchilla tarabanachanchi. Ñáucanchi Diospa shimita camachingahua pasiacpi yachachishca runaguna manachu carana anaun. Pedrohuas Señor Jesuspa huauquigunahuas chi shuc cachashca runagunahuas maitas risha caran shuc paihua quiquin quiric huarmindi purinaupi yachachishcata uyac runaguna paigunata cuiranaun. Ñáucanchi manachu chasnallata tucunata ushanchi.

Uyaccuna camachictayanapana anguichi

⁷ Sundaluga paihua quiquin cullquihuan causanzhu. Lumuta tarpuc huarmis manachu lumuta micun, huagrata cuirac runa manachu lechete upin. Chicuenta Diospa shimita yachachic runaga chi tarabananamanda cushca cullquihuan micunami.

⁸ Ñáuca mana runa yuyaimandachu rimani, Dios Moisesta quillcachishca shimita chicuintami nin casna nisha, tarabac runaguna tarabashcama manda causanami.

⁹ Pai mandashca shimita casna quillcashcami: Shuc huagra chi muyu carata llucshichingahua jaitaushcai
paihua shimita ama huataichichu nin.

Randi pai ashilla muyuta micunata munashaga micuchun nin.

Chasna quillcashca an. Chita rimasha Yaya Dios huagrallata yuyarishcachu. Mana.

¹⁰ Manachu ñucanchimandahuas yuyarira. Indá, ñucanchi yachangahua chita quillcachira. Tarpuc runas, pallashcata lluchuc runahuas tarabashcama manda maican muyutas micunata ushanaunmi jaitac huagracuinta.

¹¹ Chi tarpuc runa tarpushcata micushcacuinta Diospa shimita ñucanchi cangunata yachachishcaraicumi canguna ñucanchima charishcata cunami anguichi.

¹² Shuc camachic runaguna canguna cushcahuau micusha causanaupi ñucanchiga manachu maspas lugarta charinchi chasna causanata canguna ñucanchi camachishcata quiric tucushcamanda.

Ñaucanchita randi mana yanapashcanguichichu

Ñáucanchi randi mana imatahuas japishcanchichu canguna maquimanda. Pishi ashallata tucuita ahuantanchimi canguna Jesucristota alita quirinauchun nisha.

13 Manachu yachanguichi Diosta alabana huasibi tarabaccuna sirbishcamanda Diosma ricuchishca micunata micusha causaunguna, chasnallata Diosma ricuchishca aichatas huanchisha chimanda micuunguna.

14 Chicuinta ranata Señor Jesucristo ñucanchita mandara casna nisha, Dios quishpichishcamanda camachiccuna pahuacta tarabashcaraicu uyacunaga paigunama alita cumbiranauchun.

15 Ñáucaga canguna yachachishcamanda cumbirahuaichi nisha rimanata ushashcani randi mana rashcanichu, chi randimanda ñuca quiquin cullquiuhuanmi randisha causashcani. Cunanas mana quillcanichu canguna ñucama cumbiranauchun nisha. Cangunata yachachishalla cushiyani. Chasna yachachinata saquina randimanda micuna illac huañushaga alimaima nini.

Tucui tunucuenta tucuni quirinauchun nisha

16 Diospa quishpina shimita yachachishcamanda mas ali mani nisha mana yuyarinichu. Dios ñucata japihuashcamí chasna rangahuaca, chasna acpi imatata rashata. Mana yachachicpiga ñuca shungu yapa turmintarihuanga ñuca ranata mana pactachishcamanda.

17 Cullquita mana japishallata shungumanda yachachisha shuc cumbiranacuenta cushita japingarauni. Randi Dios ñucata japisha camachigri nisha mandashcaraicumí rana ani.

18 Ñáuca yachachishcamanda canguna cullquita japinata ushashallata ñuca quiquin cullquillahuanmi causauni. Chasna rashallata cumbiranata japisthcacuinta cushiyani Jesucristomanda camachisha nisha, uyaccuna pagahuai nisha mana yuyarinichu.

19 Ñáuca lugar runa ashallata huatashcacuinta llambu runagunata yanapac tucushcani ashcguna Jesucristota quiric tucunauchun nisha.

20 Israel runaguna Señor Jesucristota quirinauchun nisha ñuca paigunahuan tiyasha paigunacuinta tucuni. Paiguna Moises mandashca shimigunata pactachinami ashcamanda ñuca chi mana shimita pactachinata minishtishallata chigunata pactachic ani paiguna Jesusta uyanauchun nisha.

21 Chasnallata mana-israel runaguna quiric tucunauchun nisha paiguna Moises mandashcagunata mana chariccuna ashcamanda ñucahuas mana pactachiccuinta tucuni paiguna Señor Jesussta quirinauchun nisha. Chasna ashahuas ñuca Cristo mandashcataga pactachic ashcamandami Yaya Dios mandashcata mana saquinichu.

22 Chi mana sinzhi quiriccuna mas sinzhi quiringahua ñuca paigunacuinta tucuni. Maibi tiyasha chi muntunbi tiyaccuinta tucuni maican paigunamanda quiric tucunauchun nisha.

23 Ñáuca tucui imata rashahuas Jesusmanda quishpina shimi mirarichun nisha rauni Dios cungaraushcata japingahua.

*Yaya Dios cungaraushcata japinata yuyarisha
causaichi*

24 Yachanguichi ashca runaguna callpasha binsisha nishallata shuglla randi binsin. Paillami cumbiranata jipin. Chicuinta Dios cungaraushca cumbiranata japingahuaca ahuantasha causaichi.

25 Tucui callpac runaguna paiguna aichagunata sinzhita mandasha alita cuiraunguna. Binsic runa cumbiranata japi glaita mana unaihuasha chi cumbirana panga curuna chaquirisha tucurin. Ñaucanchiga Dios cumbiranata jipisha nisha ñucanchi yuyarinatas aichatas mandanchi chi callpac runagunacuinta. Randi Diospa cumbiranaga mana ima uraspas tucuringachu.

26 Yangá callpac runa mana imatas japingachu. Chasnallata shuc macac runa yangá huarallai macashaga mana imatas japingachu. Ñaucaga Jesucristohuan purisha mana paigunacuintachu purini.

27 Astahuanbas chi macaccuinta ñuca aichatami sinzhita mandani tucui uras alita rangahua. Chita mana rashaga shuccunata yachachigllaita Dios paihua cumbiranata mana cuhuangachu.

10

Israel runaguna tucus hcamanda yachashun

1 Yuyarichi huauquiguna. Ñáaupa uras Yaya Dios tucui ñucanchi huañuc apayayagunata imaibis yanapara. Paiguna purina ñambita ricuchisha paihua puyuhuan ricuchira. Tucui ñucanchi unai ñaupa huañuc apayayagunami chi puyuta catisha purishcauna. Chasnallata tucui paigunami Puca Lamarta chimbasha

Yaya Dios yacuta chaupichishcaibi chaquihuan chimbashcauna.

² Paiguna Moisesta catisha riushcai yacutas puyu ucutas pasasha bautisarishcacuinta tucushcauna. Chasna rasha Moises rimashcata uyac ashcauna.

³ Chasnallata llambulla Yaya Dios cachashca micunata micushcauna.

⁴ Pai cushca yacutas tucuigunami upishcauna. Shuc rumimanda Dios yacuta llucshichishcata llambulla upishcauna. Cristoga chi rumicuinta asha paigunahuan tucui uras puriushca.

⁵ Chasna Yaya Dios paigunata yapa yanapagllaita pai munashcata mana tucui ranaurachu. Chiraicu paigunahua allpama chara mana pactasha mana cailla huañushcauna chi chasquishca partibi.

⁶ Chasna tucushcamanda yachana anchi mana paigunacuinta rangahua. Ñaucanchiga paigunacuinta yapa mana aligunata mana munanachanchi.

⁷ Chasna yachasha paiguna rashcacuinta yanga dioscunahuacpi ama cungurisha alabaichichu. Paiguna chi runa rashca diosta balichisha Diospa shimibi quillcashcacuinta tucushcauna, chi diosta alabasha chiguna micusha machasha bailanaura nishca.

⁸ Maicanguna huarmigunata japisha juchata ranaura. Chimanda Dios libachisha ishcai chunga quimsa huaranga (23.000) runagunata shuc punzhallaibi huanchishca. Paiguna mana ali yuyarisha rashcacuinta ama ranguichichu.

⁹ Chasnallata ama yuyarishunchi ñucanchi

juchata racpiga Yaya Dios llaquic asha ñucata mana libachihuangachu nisha. Paiguna chasna Diosta piñachishcamanda paluta cachashcái paigunata huañuchingahua.

¹⁰ Maicangunaga Dios shayachishca mandac amugunata piñasha mana balinaunzhu nishcauna. Paiguna chasna rimashcamanda Yaya Dios paihua huanchic angelta cachara ashcagunata huanchingahua.

¹¹ Yaya Dios paigunata libachira paiguna yuyarisha ali purinauchun nisha, chihuasha ñucanchiraiyu chimanda quillcachira ñucanchi tucuriuna punzhaguna causac asha chita yuyarisha ali causangahua.

¹² Chasnata yachasha maicanbas ñuca sinzhi quiric asha mana urmashachu nisha rimac runaga ali yuyarisha causachun mana juchaibi urmangahua.

Yaya Dios canda yanapanmi supaita binsinata

¹³ Yuyarichi. Supai cangunata urmachinata munasha camagllaita paita binsinata ushanguichimi. Cangunata turmintachishcacuinta shuc quiriccunatas chasnallata pai quillachin. Yaya Diosca randi cangunata llaquishami supai quillachiushcaibi cangunata mana cungaringachu, canguna ahuantana tupullata saquingami mana yalicta. Supai quillachiushcaibi Yaya Dios canda ricuchingami imasna can supaita binsinata. Pai chasna canda ricuchicpi supai quillachishcata quishpinata ushanguimi mana juchata rasha. Chasnahan ahuantanguichimi.

Ama Jesucristota piñachishunchichu

14 Chasna acpi mana ashillahuas yanga diosta yuyarisha balichichu llaquishca huauquiguna.

15 Ñáuca rimashca shimi sirtu ashcata yachangahua yuyarichi. Canguna yapa yuyaiyuc ashcaraicu casna rimani.

16 Jesucristo huañushcata yuyarisha upisha pagrachu ninchi pai rahuaita ricuchishca upinamanda. Pariu upisha Cristohuan shugllashina tucunchi. Chasnallata pan paquicta pariu micusha chihuan Cristo huañushca aichamanda shugllashina tucunchi.

17 Chi pan shuglla ashallata piticpi manzhu ashca tucun. Ñáucanchi chicuintallata ashcaguna ashallata chi panda pariu micusha pariu yuyarisha shuc aichacuintalla tucunchi.

18 Israel runagunata yuyarichi. Diosma ricuchishca aichata pariu micuc runagunaga manachu Dioshuan shuglla anaun.

19-20 Chasnallata mana quiriccuna yanga diosma aichata ricuchisha mana sirtu causac Diosmachu cun astahuuanbas supaima cun. Yanga dioscunaga ushaita charinaunzhu. Mana. Chi dioscuna yanga maunguna, mana causacchaunguna. Randi chi aichaga yanga diosma cushca aicha ashallata ali man. Casna yuyarichi. Mana quiric runa yanga diosma ricuchishca aichata canguna pariu micushaga chi supaimanda yuyarishcata ricuchinguichi. Canguna ima supaiguñahuan shuglla tucunatas mana munanichu.

21 Náa yuyarichi. Cristohua rahuaita ricuchina yacutas chasnallata supaima ricuchishcatas ish-

candita (2) mana upinata ushanchichu. Cristohua aichata ricuchina panda supaima ricuchishcatas ishcandita mana micunata ushanchichu. Mana chasna ranataga yuyarinachan.

²² Ishcandita yuyaricpi Señor Jesucristo piñangami ñucanchi paillahanmi purina ashcamanda. Pai ñucanchimanda yali ushac acpi ama casna rasha piñachishunchi.

Shucta alita yuyarisha ranallami

²³ Maican Jesucristota caticcunaga lugarta charinchi imatas ranatas ninaun. Chasna agllaita mana tucui ranaga quiricta yanapanzhu. Maicanga chita ama ranguichichu ninaun, shuccunaga chita rasha alimi ninaun. Chasna rimagllaita chigunata rashahuas camba shunguta mana alichinata ushanguichichu.

²⁴ Chi randimanda shuccunata yanapanata yuyarinami anchi. Pihuas amu ali tucunallata mana yuyarinachu, astahuanbas shuccuna ali tucunata yuyarisha causashun.

²⁵⁻²⁶ Diospa shimibi casna quillcashcami: Tucui munduga Yaya Diospagmi. Chasna acpi tucui micunalla an. Chita yachasha aichata randisha mana tapusha randisha micuichi. Yanga diosma ricuchishca mana alichan nisha mana yuyarisha micuichilla.

²⁷ Shuc mana quiric runa canda rimasha ñuca huasima micucshamui nicpi can munasha paihuagma rilla micungahua. Risha pactacpi imatas canda caracpi micuilla, caiga huaglichihuangachu imata nisha mana yuyarinachu.

²⁸ Astahuanbas shuc runaga canda cai aichaga yanga diosma ricuchishca aichami nicpi ama micuichu. Can micucpiga chi rimac runa turbarishca tucungami.

²⁹ Can chita micunata ushashallata pai chi micunata sasishcaraicu ama micuichu. Can micushcata ricusha pai turbarishca tucungami. Chasna tucucpi pai ricushcaibi ama micuichu.

Chasna acpi maican canguna rimahuan-guichichari pai chita micunata mana munagllaita ñucahuas manachu ushani micunata nisha tapunguichima.

³⁰ Ñáuca Yaya Diosta pagrachu nisha micucpiga imahuacta ñucata caudsayachishca tucuni.

³¹ Chasna acpi canda nini imata micushas upishas imata rashahuas tucuita raichi tucui runaguna Yaya Diosta alita balichingahua.

³² Chiraicu ñucanchi rashcahuán shuccuna pandarisha juchaibi urmangahua mana ranachanchi. Tucui runagunata israelgunatas, mana-israel runagunatas, Diosta quiric muntundas mana pandachisha tucuita alita rasha yanapanami anchí.

³³ Ñáucaga imata rashahuas runagunata yanapangahua alita yuyariuni. Tucui runaguna quispishca tucuchun nisha ñuca quiquin munaita mana yuyarishachu randi shuccunata yanapasha nini.

11

¹ Cristo purishcacuinta ñucas puriuni, cangunas chasnallata ñuca purishcacuinta purichi.

Pariulla tendarisha ranaguna

² Canguna ñucata yuyarishami, ñuca yachachishcata mana cungarishachu pactachisha alita causanguichi. Chimandami alimi nisha cushiyani llaquishcaguna.

³ Shuc shimita mas charini cangunata yuyarichingahua. Yaya Diosca Cristota mandashcacuinta Jesucristo paita quiric runagunatas mandanmi. Chasnallata shuc cariga paihua quiquin huarmita mandanmi.

⁴ Ñá cariguna Yaya Diosta mañaushcái, Dios yuyachishcata rimaushcái, umata taparishaga pingarishca tucun.

⁵ Huarmigunaga randi Yaya Diosta mañaushcái, Dios yuyachishcata rimaushcái, umata mana taparishaga pingarishca tucun. Pai chasna mana tapashaga paita mandac cari illaccuinta ricuringa, accha illaccuinta pingarishca tucungami.

⁶ Shuc huarmi pahua umata mana taparinata munashaga pahua acchata illacta pitirichun. Randi ama pingaringahua pahua acchata mana pitirinata munashaga pahua umata pacarichun.

⁷ Runagunaga Diosta ricuchimmi. Dios punda runata rasha pai munashcacuintata rashcamí runa rimangahua Dios ñucata mandac man nisha. Chimandahuasha huarmiga ñuca cari ñucata mandahuan nisha rimana man. Chasna acpi runa Dios ali acta ricuchic asha caran cuti paita mañaushcrais camachiushcrais pahua umata mana taparinzhu.

⁸ Yuyarichi. Dios punda carita rasha mana huarmi cushtillamanda rashcachu astahuanbas cari cushillamandami huarmita rashca.

⁹ Carita mana rashcachu huarmita yanapan-gahuaca randi huarmita pahua carita yana-pachun nishami rashca.

¹⁰ Chimandami huarmi pahua cari mandash-cata uyac ashami umata taparinami angelgu-nahuas ricungahua.

¹¹ Chasna agllaita Diospacpi caris huarmis pariu yanapanacun. Tucui cariguna illacpi huarmiguna causanata ushanaunzhu. Mana. Tucui huarmigunas illacpi cariguna causanata ushanaunzhu. Mana, mana ushanaunzhu ansas.

¹² Dios chi punda huarmita raushcai cari aichamandami rashca. Cunanga cari pagarisha huarmi aichamandami llucshin. Dios chasna ishcandita (2) rashcami.

¹³ Cangunallata yuyarichi. Huarmigunaga Diosta mañaushcai paiguna umata mana taparicpiga alichanga. Mana.

¹⁴ Ñáucanchi yuyaibi cari suni acchata char-ipciga pinganayacta tucun. Canguna manachu chasnallata yuyaringuichi.

¹⁵ Chi huarmiguna Dios cushca suni acchata charinaun umata tapasha cushita charingahua.

¹⁶ Chasna agllaita maicanbas chi yachachish-cata mana uyanata munashaga yachachun, ñucanchihuas tucui quiric muntungunahuas chicuinta pariu yuyarinchimi.

Canguna tandarishcai imasna micusha upinguichi

¹⁷ Ñáa shuc yuyaita cangunata yachachinata munani. Canguna rashcagunata yachasha alita

ranguichi nisha rimanata mana ushanichu. Cangunapura yanapanacuna randimanda huaglichinacunguichi.

¹⁸ Canguna quiricpura pariu tandarishallata chican chicanda yuyaringuichi. Chasna shuc shimi cangunamanda pactamuahuashca. Chi shimita nictaga ña chita ashillata quirini.

¹⁹ Ali quiric ashcata ricuchingahuaca cangunapura chicanyarishami ali anma.

²⁰ Canguna tandariusha Señor Jesus huañushcata yuyarinata micungahua tandarinchi nishallata mana chita yuyaringahua shamunguichichu.

²¹ Randi paitaga mana yuyarisha amullata micusha nisha yuyaringuichi. Caran amu pahua quiquin apamushcata uctalla micushun nisha micunguichi upinguichi shuccunata mana chapaña. Chasna tucucpi maicanguna ashillata apamusha raicasha tiyaunmi, shuccunaga ashca apamusha machashca tiyanaun. Chasna uyashcani.

²² Manachu micuna upinas canguna quiquin huasibi tiyan. Chasna tiyacpi imaraicuta chi ashillata apamuc pugri runata pingachinguichi. Can chasna rashaga Diospa runagunata mana balichinguichichu. Imasata ninguichi, ñuca canguna chasna rashcamanda alitachu rimasha. Sir tupacha cangunamanda alita rimangahua mana ushanichu.

*Jesucristota yuyarisha micuna
(Mt 26.26-28, Mc 14.22-24, Lc 22.19-20)*

²³ Señor Jesucristo ñucata yachachihuara pai huañushcata yuyarisha micunamanda. Chasna

pai yachachishcacuenta cangunama randi yachachishcani casna, Señor Jesusca paita huanchiccunama japatucuna tutami panda japisha Diosta pagrachu nira.

²⁴ Pagrachu nishcahuasha chi panda pitisha rimara, micuichi, caiga ñuca aichacuenta man, cangunamanda huañuna. Caita micushami ñucata yuyarichi nira.

²⁵ Chasnallata micui pasashcahuasha pillchita japisha rimara, cai vinoga ñuca raihuai man, Dioshuan alichina mushuc shimita ricuchinmi. Ñáuca talishca rahuai chi mushuc shimi sirtu pactaringaraushcata ricuchinmi. Ima uras caita upishahuas ñucata yuyarichi nira.

²⁶ Chasnamandami Señor Jesucristo shamunagama caran cutin canguna cai micunata micusha cai upinata upisha pai ñucanchimanda huañushcata rimanacunguichi.

Aliyuyaihuan Jesusta yuyarina micunata

²⁷ Maican runa mana ali shunguhuan cai panda micusha cai upinata upishaga Cristohua aichata rahuaitas mana balichishami juchata ran.

²⁸ Chiraicu caran amu yuyarina an. Chara cai pandas cai upinatas mana japiushallata canguna shungu ucui aucunata yuyarina an. Jucha rana mana tiyacta yachasha japichilla.

²⁹ Maicanbas yangamanda japisha Jesucristo huañushca aichata mana yuyarishaga yapa caud-sayachishca tucungami.

³⁰ Maicanguna mana ali shunguhuan japishmaraicu sambayashcacuenta puringuichi,

maicanguna ungushcanguichi, maicanguna huañushcaunami.

³¹ Randi ñucanchi shungu ucuta ñucanchillata sumacta yuyarisha pandashcata alichishaga mana caudsayachishca tucunchima.

³² Astahuanbas ñucanchi shungu ucuibí jucha yuyarishcata mana alichicpiga Señor Jesus ricusha yachasha ñucanchita libachinmi ñucanchi huasha chi mana quiriccunahuan taripaitucungahuan.

³³ Chasna yachasha huauquiguna Señor Jesucristo huañushcata yuyarisha micungahuami tandariushcai chapanacuichi tucui pariu micungahua.

³⁴ Maicanbas raicashca ashaga paihua quiquin huasibi ñaupata micuchun nini canguna mana pandasha libachishca tucungahua. Alimi. Ñáuca cangunahuagma shamusha chi shuc canguna quillcashca alichinagunatas alichishami.

12

Diospa Samai paihua runagunama cumbiranamanda

¹ Cunanga Diospa Samai paihua runagunama cumbiranagunamanda cuintasha. Yachaichi huauquiguna, Diospa Samaiga caigunata cunmi quiriccuna alita rangahua.

² Canguna yachanguichi ñaupa mana quirishca uraspi shuc runagunacuenta yanga dioscunata balichishcanguichi. Chi yanga dioscunaga mana causac asha mana rimanatas ushanaunzhu.

³ Chasna mandami runaguna yachanata ushanaunmi maican runa Diospa Samai

ushaihuan rimac acta. Diospa Samai yuyaihuan rimac runaga ima uras Jesus mana balinzhu nisha rimanata mana ushangachu. Randi Jesusca tucuimanda yali mandac amu man nisha Diospa Samaillahuanmi rimanata ushan.

⁴ Dios ranagunaga manachu ashca tunu aun-guna. Indá. Diospa Samaillami chi tucui tunu ranagunata cushcami.

⁵ Quiriccuna Diospacta rashami ashca tunu ranaguna agllaita shuc amulla maun tucui chi ranagunahuan sirbingahua.

⁶ Yaya Diosca paihua runagunata chicanda tarabachin. Paillami runaguna shungu ucui tarabasha paiguna alita pahuacta tarabangahua yuyachin.

⁷ Caran shucpi Yaya Dios pahuacta Samaita ñucanchi charicta ricuchiun cushcagunata ranami anchi tucui quiricpura yanapanacuchun nisha.

⁸ Diospa Samaimi casna rachin. Maican runagunama Diospagmanda rimana yuyaita cun, maicangunama alita yachana yuyaita cun. Ishcandima (2) cushca aunguna Diospa Samai ushaihuanmi rangahua.

⁹ Chasnallata shuccunama yuyaita cun Diosta sinzhita quiringahua. Maicangunama ushaita cun ungushca runagunata aliyachingahua.

¹⁰ Maicangunama yuyaita cun pihuas mana rashcagunata rangahua, shuccunama Dios rimashcata alita pasachingahua. Shuccunama yuyaita cun yachangahua Dios rashcachu supai rashcachu nisha. Maicangunama amu mana yachashca shimita rimangahua yuyaita cun.

Shuccunama yuyaita cun chi shimita uyasha llambugunama pasachingahua.

11 Chasna ashca tunu ranaguna agllaita shuc Samaillami tucui quiriccuna shungu ucuibi pai munashcallata caran shuc runa ranauchun nisha paiga cun.

Llambu quiriccuna Cristo aichacuinta anchi

12 Runa aichaga ashca cuyurinagunata charishallata shuc aichalla maunchi. Maquihuas chaquihuas ñahuahuas shunguhuas ashca chican agllaita shuc aichalla tucunchi. Chicuanta ñucanchiga Cristo aichacuinta asha, ashca ashallata shuc aichacuintalla anchi.

13 Náucanchi bautisarishcai Diospa Samai ñucanchita Cristo aichacuinta shugllata rashcam. Maican israel runa ashas, maican mana-israel runa ashahuas, maican amuyuc ashas maican lugar runa ashahuas, llambu ñucanchi shuc aichacuintalla anchi. Yaya Dios tucui ñucanchima pahua Samaita cushca ñucanchi shungu ucuibi achun nisha.

14 Aicha cuyurinaga mana shugllachu astahuanbas ashca tiyan.

15 Chasna acpi ñuca chaquiga mana maqui ashallata chara ñuca aichaibi tiyan.

16 Chasnallata ñuca rinri mana ñahui muyu ashallata ñuca aichaibi tiyan.

17 Náa intiru aicha shuc jatun ñahuilla asha rinri illacpiga imasnata uyanchima. Ñáuca aicha shuc jatun rinrilla asha singa illacpiga imasnata muctinchima.

18 Dios chiraicu tucui aichaibi caran tunu cuyurinata churashca pai munashcacuinta.

¹⁹ Runa aichaga ñahui muyulla acpis, rinrilla acpis, maquilla acpis, mana balic aicha saquirinma.

²⁰ Astahuanbas ashca cuyurina pariu tiyasha shuc ali aichalla tucun. Chicuinta ñucanchi quiriccuna chican tunu ranagunata rashallata Dios munashcatami tucuita pariu ranchi.

²¹ Ñáuca ñahui ali agllaita rinritahuas munani. Ñáuca uma ali agllaita chaquitahuas munani. Chasnallata shuc quiric runaga paihua quiric huauquita mana rimanachu canda mana munanichu nisha.

²² Randi chi mana sinzhi cuyurinaguna illacpiga ali causanata mana ushanchimachu.

²³ Chasnallata chi mana balichishca partigunata sumacta churachinchi, pingaigunata mas alita catarinchi.

²⁴ Ricurina partigunata randi mana imatahuas churachinchi. Dios ñucanchi aichata rasha alita rashcami chi mana balichishcagunatas balichishca tucungahua.

²⁵ Chiraicu chi cuyurinaguna mana paillata yuyarinaun randi tucui aicha pariu cuirarisha yanapanacusha causaunguna.

²⁶ Shuc nanaricpi manachu intiru aicha nannarin. Chasnallata shuglla ali acpi manachu intiru cushi tucun.

²⁷ Cangunaga chicuinta Cristo aicha manguichi. Caran shuc pahua ranata charinguichimi aicha cuyurinacuinta.

²⁸ Aichaibi ashca cuyurinaguna tiyashcacuinta Jesucristota quiriccunata Yaya Dios ashca tunu ranagunata caran shugma cushcami.

Casnami aunguna. Pundami anaura Jesus japisha cachashca runaguna, chihuashami paishua shimita camachiucuna, chihuasha yachachiucuna, chihuasha pihuas mana rashcagunata raucuna, ungushcagunata alichiucuna, shuccunata yanapaucuna, mandaucuna, mana yachashca shimita rimaucunatas churashcami. Ricui, chiguna Diosca cushcagunami.

²⁹ Chiguna mana llambulla Jesus japisha cachashca runa chaunguna, mana llambulla Diospa shimita camachiccuna chaunguna, mana llambulla yachachiccuna chaunguna, mana llambulla pihuas mana raushcagunata raucchaunguna.

³⁰ Chasnallata mana llambulla ungushcagunata aliyachinata ushaungunachu, chasnallata shuc mana yachashca shimita mana llambulla rimanata ushaungunachu, chi shimita pasachinata mana llambulla ushaungunachu. Mana llambu pariu raungunachu randi caran shucca Dios cushca ranata raungunami.

³¹ Chasna acpi Yaya Dios ushaita cangunama cucpi tucui chigunamanda mas balic ranagunata yapa munaichi. Chasna agllaita cangunata mas ali shimita yachachishami.

13

Llaquinamanda

¹ Ñáuca ashca shimigunata rimanata ushashallata, angelguna shimitahuas rimashallata astahuanbas shuccunata mana llaquic runa ashaga mana balicchani, shuc tán

tán tán uyaric mangata huactashcacuinta mani,
yangalla rimani.

² Diospa shimita ñuca yapa alita camachiushahuas, shuccunama mana yachachishca yuyaigunatas tucuitas ñuca yachashallata, chasnallata urcugunata anchuchingahua tucui shunguhuan Diosta quiric ashallata astahuan shuccunata mana llaquic runa ashaga mana balicchani, yanga mani.

³ Pugri runagunama tucui ñuca charishcaguna cumbirashallata, Diosta balichingahua ñuca aichata rupachichun nisha cushallata astahuan ñuca mana llaquic runa ashaga rashcani.

⁴ Shuc runa quillachiupis chi llaquiu runaga ahuantagmi an mana piñasha. Llaquiu runaga llambu runagunata yapa alita yanapan. Shucpa charishcatas mana munanzhu, chasnallata amul-lata alabarinata mana yuyarinzhu.

⁵ Llaquic runaga jiridsa mana ranzhu, mana paihuagllata yuyarisha mitsanzhu, mana piñasha causanzhu. Shuc runa mana alita raupiga llaquiu runa mana yuyarisha causanzhu.

⁶ Ima mana ali rashcagunatas mana gustasha llaquirinmi randi sirtu rimashcagunataga gus-tasha cushiyani.

⁷ Llaquic runami shuccuna imata racpihuas tu-cuimanda ahuantagllami. Yaya Diostaga alipacha quirishami cushiyasha chapaunmi. Llaquiu runa chasnallata ima tucucpihuas mana saquinzhu.

⁸ Llaquinaga ima uraspas mana tucuringachu. Dios rimashcata pasachishca shimiguna tucuringami. Ñáaupa mana yachaushca

shimigunata rimanahuas tucuringami,
chasnallata ima yachanahuas tucuringami.

⁹ Cunanga ashilla yachashallata mana
tucuita yachanchichu. Diospa shimita
camachishallata Dios tucui yuyarishcagunata
mana yachanchichu.

¹⁰ Randi puchucuai punzha ñucanchi sumac tu-
cushca uraspi ñucanchi cunan yachashcagunaga
yanga tucungami.

¹¹ Huiñashcacuenta man. Ñáupa uras
ñuca huahua asha huahuacuenta rimarani,
huahuacuenta yuyarirani. Randi cunanga
rucuyasha huahuacuenta ranata saquishcanimi.

¹² Cunanga cai mundui causasha ñahuihan
Diosta ricunata mana ushanchichu, shuc rucu
espiyubi ricurishcacuenta an. Huasha randi
ñahuipura Yaya Diosta alita ricunacungaraunchi.
Chasnallata cunanga ashillata yachanchi, huasha
randi Yaya Dios ñucanchita yachashcacuenta paita
alita yachangamirauchi.

¹³ Alimi. Chasna acpi quimsa (3) mana tucurina
aunguna. Caigunami Diosta quirina, paita cushi-
huan chapanas, llaquinahuas. Chi quimsamanda,
llaquinaga mas yali balic man.

14

Mana yachaushca shimita rimanamanda

¹ Chasna acpi llaquiu runaguna aichi. Chasnallata
Dios cushca ranagunata yapa munaichi. Tu-
cui chimanda Diospa ushaihuan paitua shimita
yachachinata mas munaichi.

² Can Diospa Samai yuyaihuan mana yachashca shimita rimacpiga Diosllatami rimangui. Randi runaguna uyashallata mana pihuas chi shimita yachasha mana asirtanaungachu.

³ Randi Diospa shimita yachachic runaga tucui runagunata yanapan. Maicanguna ali yuyaiyuc tucungahua, shuccunas mas sinzhi quiric tucungahua shuccunas imatas ahuantangahua yanapan.

⁴ Chi yachachisha mana yachashca shimita rimac runaga amullata yanapan ali yuyaric sinzhi tucungahua. Diospa shimita yachachic runa randi llambu quiriccunatami yanapan huinguna sinzhi tucungahua.

⁵ Tucui canguna mana yachashca shimigunata rimaccuna tucupi ali anma nini. Chasna tucunamanda mas munani canguna Diospa shimita yachachingahua. Chi mana yachashca shimibi rimana randimanda Diospa shimita yachachinaga manachu mas ali an. Chi mana yachashca shimita rimacpi shucca uyaccunahua shimima pasachinami. Chihuan ña tucui quiriccuna huiñashcacuinta sinzhi quirisha causangaunami.

⁶ Yuyarichi huauquiguna. Ñáuca cangu-nahuacpi pasiausha shuc tunu shimita rimashaga imasnata cangunata yanapaima. Chi Dios ñucata ricuchishcata yachachishcetas rimasha, Diospa shimita camachisha, quiric causanamanda yachachisha, cangunata yanapani.

⁷ Tucashcagunata yuyarichi. Ilu pucuna bigulinbas ñuca rimashcacuinta an. Ali tucacpi

yachanalla an. Randi yanga mana ali tucacpi imata tucunatas mana yachaibacchu.

⁸ Sundaluguna chasnallatami. Paiguna tandarisha guerama ringahua paigonata mandac runa curmitata tucan. Randi mana alita tucacpi imasnata yachanaunga guerama rinata alichingahua.

⁹ Cangunahuacpi chasnallatami. Canguna shuc mana yachashca shimita rimacpi imasnata shuc-cuna can rimashcata yachanaunga. Chasna rasha manachu yanga huairaibi rimanguichi.

¹⁰ Tucui munduibi ashca tunu shimiguna aun-guna. Chi shimigunata rimacpura ña tucui ri-mashcata yachaungunami.

¹¹ Randi shuc tunu rimashcata mana yachashaga carumanda shamuc runacuinta tucuni, pai chasnallata carumanda shamuc runacuinta asha ñuca rimashcata mana yachangachu.

¹² Chita yuyarisha Diospa Samai ushaihuan ranata yapa munashaga yanapanata mas mu-naichi llambu quiriccunata sinzhiyachingahua.

¹³ Chasna acpi can mana yachashca shimita rimac runa ashaga Diosta tapuna mangui yuyaita cuhuai nisha chi can rimashcataga ñucanchi quiquin shimima pasachingahua.

¹⁴ Ñáuca shungumanda mana yachashca shimi-huan Diosta mañashallata ñuca yuyai chi rimash-cata mana asirtanzhu.

¹⁵ Chasna acpi imasata rasha. Casna rashami. Diospa Samai cushca shimita ñuca shunguhuan mañashami chasnallata quiquin yuyaihuan mañashami. Ñáuca cantausha shunguhuanbas

chasnallata ñuca asirtana yuyaihuanbas cantashami.

¹⁶ Canguna pariu yachaucunaga tandariushcaibi camba shungüi cushiyasha Diosta pagrachusha shuc shimita rimacpiga mana yachaucunaga can rimashcata mana yachasha canhuan pariu pagrachunatas mana ushanaungachu.

¹⁷ Chasna asha Yaya Diosta pagrachu niushal-lata mana yanapanguichu shuc uyac runa mana intindisha mas sinzhi quiric tucunata.

¹⁸ Náucaga mana yachashca shimigunata ri-manata ushani tucui cangunamandas yalita. Chiman-dami Diosta pagrachuni.

¹⁹ Chasna ashallata ñuca ashca shimita rimashallata paiguna mana yachacpiga yanga rimaíma. Chiraicumí quiriccuna tandarishcaibi paiguna quiquin shimillai ishcai shimillata rimanata munani paiguna alita yachanauchun nisha.

Rucu runacuinta yuyaihuan causaichi

²⁰ Imata rangahuaca ama huahuagunacuinta yuyarisha causanachanguichi huauquiguna, randi rucugunacuinta yuyarisha causana anguichi. Náa huahuaguna juchata mana yuyarishcacuinta sirtu paigunacuinta aichi.

²¹ Diospa shimbí casna quillcashcami:
Carumanda chican shimita rimaccunata
ñuca israel runagunahuagma cachashami
rimanauchun nisha.
Chasna rimagllaita ñuca shimita mana uyahua-naungachu, nishami Dios nishca.

22 Chasna yachanchi shuc mana yachashca shimita Dios rimachin chi mana quiric runaguna manzharisha yuyarichun nisha. Randi Diospa shimita yachachinaga quiriccuna pai munashcata yuyachinmi.

23 Chasna acpi tucui canguna tandariushcai tucui canguna shuc tunu, shuc tunu shimigunata mana rimanachu. Tucuiguna mana yachashca shimigunatas rimacpiga mana quiric runagunas mana yachashca quiriccunas cangunahuagma shamusha uyasha llambu shuc lucu rucucuenta tucushcaunami nisha rimanaungami.

24 Astahanubas canguna Diospa shimita yachachiushcrai maican paiguna shamusha uyasha tucui rashcagunata ricusha pahua jucha rashcata yuyaringami.

25 Pahua shungüi mana ali yuyarishcaguna pagllai ricurishcacuenta tucunga. Chasna tucusha pahua cungurisha Diosta alabasha balichingami. Sirtumi Dios caibi cangunahuan tiyaun nisha rimangami.

Quiriccuna tandarishcaibi ranaguna

26 Alimi quiric huauquiguna, casna anami. Canguna tandariushcai caran amuga Dios cushca ranata rachun. Maicanga cantachinata, maicanga yachachinata, maicanga Dios ricuchishcata rimanata, maicanga mana yachashca shimita rimanata, chihuasha chi shimita uyasha quiquin shrima pasachinatas. Chasna imata rashas tucuita rana anguichi tucui quiriccuna huiñashcacuenta Jesucristohuan sinzhiyachichun.

27 Maicanguna mana yachashca shimigunata rimashun nisha shuc shuc rimanauchun mana pariu. Randi ishcai (2) quimsalla (3) rimachun. Chasnallata maican runa paiguna rimashcaguna yachashca shimima pasachinauchun.

28 Canguna tendarishcaibi pasachic runa illacpiga chi mana yachashca shimita ama rimaichichu, astahuanbas chi runa Diosllahuan rimachun mana llambu runa uyaushcaibi.

29 Chasnallata caran cuti ishcai quimsalla Diospa shimita yachachichun. Chibi tiyauc uyaccuna sirtuchu nisha yuyarinauchun.

30 Chasna Dios mushuc shimita cangunata yachachingahua shuc tiyauc runata yuyachicpi ñaupapunda rimauc runa saquichun chi mushuc rimashcata uyangahua.

31 Chasna rasha tucui canguna Diospa shimita yachachiccuna shuc randi, shuc randi rimanata ushanguichi. Chasna racpi tucui quiriccuna yachashami sinzhiyangauna.

32 Diospa shimita yachachiccunaga quiquinba shimita mandanaunmi, mana yanga munaimanda rimanachan.

33 Chasna acpi Dios cangunata yuyarichicpiga alita uyaibagllata rimana manguichi. Yaya Dios alita mandac asha tucui quiric muntunbi pariu ali aichi.

34 Cangunahuas chasnallata casna raichi. Quiriccuna tendarishcaibi huarmiguna chunlla tiyanauchun. Ñáupa urasmanda Diospa shimibi chasna quillcashca man huarmiguna chunlla tiyasha uyanauchun mana cuantarisha.

35 Pai imatahuas yachanata munashaga

huasima rishcai paihua carita tapuchun yachangahua. Quiriccuna tandarishcaibi huarmiguna rimanaga mana balinzhu.

36 Caita yuyarichi. Diospa shimiga mana cangunahuanzhu callarira, Yaya Dios yuyachishca punda japistha runagunahuacpi callarirami. Chigunaga cangunamanda ñaupa quiriccuna tucushca acpi ama yuyaringuichichu pahua shimi ñucanchillami uyaranchi nisha.

37 Chita yuyarisha Diospa shimita yachachic mani nisha rimac runaga, Diospa Samai ushaita charinimi nisha rimac runahuas Señor Jesus mandanatami ñuca ña cangunata quillcashcataga yachaichi.

38 Maican chita mana chasna yuyaricpi paita ama uyaichi.

39 Diospa ushaihuan pahua shimita yachachinata munaichi huauquiguna. Chasna munashal-lata shucca mana yachashca shimita rimangahua callaricpi ama jarcachishunchichu.

40 Astahuanbas canguna imatas raushahuas alita yuyarishami rana anguichi.

15

Jesucristo causarishcamanda

1 Cunanga Jesucristo quishpichina shimita ñuca ñaupa cangunata camachishcata cuti yuyachinata munani huauquiguna. Chi shimita quirishcamanda ali sinzhi tucushcanguichi.

2 Ñáuca yachachishca shimita canguna quirisha mana saquishaga sirtu quishpichishca anguichi.

Mana chasna ashaga yanga shimillahuan quirishcanguichima.

³ Ñaucata yachachishcagunata cangunata camachirani. Chi balic shimiga Diospa shimibi quillcashcacuinta casna man, Cristo ñucanchi jucha rashcagunata pichangahua huañushcamí.

⁴ Pai huañucpi pambanaurami. Quimsa (3) punzhaibi Dios paita causachira pahua shimibi quillcashcacuinta. Chasna tucungaraushcata Diospa shimibi ñaupa quillcashca tiyara.

⁵ Pai causarisha punda ricurira Pedrohuacpi, chihuasha tucui pai japistha runagunahuacpi ricurira.

⁶ Chihuasha pichca patsac (500) yali pariu tandarishca quiriccunahuacpis ricurimura. Chigunamanda maican paiguna ña huañunaushca, randi ashcagunami chara causanaun.

⁷ Chihuasha Santiagohuacpis ricurimura, chihuashaga llambu pai chunga ishcái (12) japistha cachashca runaguna tandarishcaibi shamusha pagllai ricurimusha.

⁸ Tucui chigunahuacpi ricurishcahuasha ñucahuacpis cungaimanda ricurihuara shuc shullarishca huahua cungaimanda pagarishcacuinta.

⁹ Chi uras Diospa runagunatas yapa turmintachishcamanda mana baliccharani. Chasna acpi Señor Jesucristo tucui pai japistha camachigrichi nisha cachashca runagunamanda ñuca pishi balic mani.

¹⁰ Chasna mana ali agllaita Dios ñucata yapa llaquishcamandami ñuca shungüibi pai munashcata rasha, ñucata japistha pai

quishpichina shimita yachachichun nisha cachahuara. Chasna racpi mana ñuca quiquin ushaihuanzhu chasna tucurani randi Dios llaquic asha ñucahuau ashcamandami tucui chi shuc japishca runagunamanda yali sinzhita tarabaurani.

¹¹ Chasna acpi ñuca tarabacpihuas paiguna tarabacpihuas ishcandi ali an. Chi shimillata camachinchi, camachicpi quirishcanguichi.

Huañushca runaguna causarina maunguna

¹² Cristo huañushcamanda causarishcata camachinchi. Chasna camachisha yachachicpiga imahuacta cangunapurai maicangunaga rimanguichi runa huañushcahuasha mana cuti causaringachu nisha.

¹³ Huañushcamanda mana causarina acpiga Cristohuas mana causarinmachashca.

¹⁴ Náa Cristo mana causarishca acpiga ñucanchi camachina shimiga yanga anma, chasnallata canguna Cristota yanga quiringuichima.

¹⁵ Chasna acpiga Diosmanda llullanchima Diosmi Cristotaga causachira nisha. Randi riciuchi, huañushcamanda mana causarina acpiga Dios Cristota mana cuti causachinmachara.

¹⁶ Huañushcaguna mana cuti causarina acpiga Cristohuas sirtu mana causarinmachara.

¹⁷ Cristo mana causarishca acpiga yanga quirishcanguichima, chara juchayuc anguichima.

¹⁸ Chasna acpiga huañushca quiriccunahuas huiñai chingarinaunmara.

¹⁹ Astahuanbas cuti causaric Cristota quirishcamanda huiñai paihuan ali causangamiraunchi.

Mana chasna acpiga Cristota quiriccuna causaganamalla pai ñucanchita yanapanga nisha tucui runagunamanda yali llaquirishca rimaitucunchima.

²⁰ Chasna yuyarigllaita Cristo huañushcamanda sirtu causarishcami. Pai ñaupapundapacha causarishami tucui paita quiric huañushcagunahuas causarina ashcataga ricuchiun.

Puchucaibi Jesucristo huañuita binsingami

²¹⁻²² Ñáupa uras Adan mana alita rashcamanda tucui runagna huañuituranchi. Chasna agllaita Cristoraicumanda causaringamiraunchi mana cuti huañungahua. Yuyarichi, casna man. Shuc runamandallami huañunaga callarira. Chasnallata shuc runamandallami causarinaga callarira.

²³ Dios munashca uraspi llambu pahua runagna causaringaunami. Cristoga punda pallashcacuinta ñaupapunda causaric asha cuti cai munduma shamusha llambu pahua runagunata causachisha pallashcacuinta japisha pushangami.

²⁴ Chihuasha tucurina uras pactamungami. Chi uras Cristo shamusha tucuita binsingami. Binsisha tucuchingami tucui amugunata, jatun mandac runagunatas, tucuba ushaigunatas. Tucui binsishcagunata pahua Yayama cumbirangami, chasna cucpi Yaya Dios llambugunata mandac manga.

²⁵ Ricuichi, casnami tucunga. Cristo mandanami anga tucui paita piñaccunata binsinagama.

²⁶ Tucui piñaccunata binsisha puchucaibi huañuitaga binsingami.

27 Diosca tucuita Cristoma cushcami pai llambugunata mandac tucuchun nisha.

Chasna Diospa shimbí quillcashcami, llambugunata Cristoma cushcami nishallata Yaya Diosmanda mana rimanzhu. Astahuuanbas Yaya Diosca Jesucristoma llambugunata cushcamanda pailla mana cushcachan.

28 Chasna acpi Yaya Dios illacta pahua churima cushcahuasha Cristoga tucuigunahua gubirnu tucusha llambugunata pahua yayama cutichisha pahuas paillata Diosma cungami. Chasna tucupi Dios sirtu tucuimanda yali anga.

Causarishcamanda camachicpi turmintachitucuni

29 Cuti caita yuyarishun. Huañushca runagunaga mana cuti causaringachu nishaga imangahuata huañushca runata yuyarisha bautisaringuna. Imamandata huañushca runamanda bautisarinaun mana cuti causaricpiga.

30 Causarina illacpiga imangahuata tucui uras ñalla huanchitucuna purinchi.

31 Caran punzha turmintarisha tiyasha sirtumi huañunacuinta ani huaquiguna. Randi canguna Señor Jesucristota quirishcaraicu cushiyasha casnata rimauni.

32 Efeso llactaibi tiyac runaguna yapa mana alitachu rahuanaura piñac pumacuinta. Runa yuyaimandallata yachachishcamanda turmintarishaga yangami turmintarima arani. Huañushcahuasha mana cuti causarina acpiga shuccuna rimacshina caya huañuichari

tucushcamanda micushalla upishalla
causashunchi nisha quillcashcata rimanchima.

³³ Ama umachishca tucunachanguichi. Canguna mana ali runagunahuan purishaga cangunahuas mana ali tucunguichimi nin.

³⁴ Juchata saquisha ali puringahua cuti yuyarichi. Ricuichi, maican cangunahuacpi chara Diosta mana yachaccuna tiyaunguna. Chiraicumi caita rimani cangunata pingachingahua.

Causarishca aichamanda

³⁵ Maican runaga tapunguichimachari imasata huañushca runa cuti causaringa, causarishcahuasha ima tunuta ricuringa.

³⁶ Chasna tapusha mana yuyarisha tapun. Cuti causarishca runa aichaga muyu caracuinta man. Muyu manachu huañusha ismushca tucun. Chasna ashallata manachu huiñasha pangayuc tucun.

³⁷ Canguna ima muyutahuas tarpusha sarata inzhictas trigotas tarpusha mana ruyatachu tarpunguchi randi muyugunallata tarpunguichi.

³⁸ Ñáa chi muyuguna allpamanda llucshisha Dios ñaupa mandashcacuinta quiquin ruya tucunaun. Caran shucta paihua quiquin pangata cushcami. Shuc muyuga shuc tunu ruya tucun, shucca paihua tunu tucun.

³⁹ Chasnallata tucui aichaguna mana shuc tunullachu aunguna, runa aichaga shuc tunu, sacha aichaga shuc tunu, pishcu aichaga shuc tunu, yacuibi tiyac aichaga shuc tunu.

⁴⁰ Cai munduibi tiyac aichaga caran tunu aunguna. Chasnallata jahuapachai tiyaccuna caran tunu aunguna. Mundui tiyaccuna ali ricurinaga

shuc tunumi, jahuapachai sumac ricurinaga shuc tunumi.

⁴¹ Indi quilla estrellascunas punzhayachisha caran shuc chicanda punzhayachin. Caran estrelas chicanda punzhayachin.

⁴² Chicuinta huañushca aicha causarisha chican tucunmi. Huañushcata chingachicpi aichaga ismunmi, causarisha mana cuti huañungachu.

⁴³ Ismuucta chingachinaun, causarisha ali aicha tucun. Api samiga pambaitucun, ushayucca cuti causarinmi.

⁴⁴ Cai mundumanda aichata chingachinaun, jahuapachamanda aicha causaringami. Cai munduibi aicha acta yachasha jahuapachais tiyangaraushcatas yachanchimi.

⁴⁵ Diospa shimi caicuinta quillcashca an:
Adan nishca ñaupapunda runa causac ashca.
Chihuasha mushuc Adancuinta runaga Cristo mara. Pai causaita cuc asha runagunata cuti causachinata ushanmi.

⁴⁶ Jahuapachamanda runaga cai munduma mana punda shamushcachu randi cai pachamanda runaga punda cai mundui causashcami, chihuasha jahuapachamandami ricurimushca.

⁴⁷ Ñáupapunda runaga allpamanda rashca asha allpayuc ara. Huasha runaga ñucanchi Señor Jesucristo jahuapachamandami ara.

⁴⁸ Adancuinta runaguna cai pachamanda aichata chariunguna. Cristohua runaguna paicuinta tucusha jahuapachamanda aichata charinchi.

⁴⁹ Ñaucanchi cunan caimanda aichata charishallata huasha jahuapachamanda Cristocuinta aichata charingamiraunchi.

50 Caita rimani huauquiguna. Cai pachamanda rahuaiyuc ismuna aicha jahua pachama Diospagma mana yaicunachu. Yuyarichi. Ismusha tucurina aichaga Dios cushca mana ismuibaccunata japinata mana ushanzhu.

Ñáucanchi aicha cambiaringami

51 Ñáupa mana yachashcagunata cunan cangunata yachachishami. Tucui ñucanchiga mana huañungachu raunchi randi cambiarisha mushuc tucungamiraunchi.

52 Huairashina ñahui pín rashcallaibi cambiarishca tucungaraunchi. Puchucai curmitata tucashcahuan tucurishcata yachachinga. Chasna chi curmitata tucushcahuan huañushca quiriccuna llambu causarinaunga mana cuti huañungahua. Chi uras ñucanchi aicha cambiarisha mushuc tucuna angaunami.

53-54 Cai ismuna huañunalla aicha mana cuti huañuna aichayuc tucunami an. Chimanda Diospa shimibi quillcashcaga pactaringami casna nisha:

Dios tucuita binsisha alichingami,
paita quiriccuna mana cuti huañunaungachu.

55 Pundamanda runaguna huañunaushca,
chasna ashallata ña mana cuti huañunata ushanaungachu.

Ñáupa huañuita manzhac runaguna cunan mana mas manzharinaungachu.

Chasna Diospa shimibi quillcashcami sirin.

56 Diospa shimita mana uyasha juchayuc ashcata riparanaun. Juchata rashcamanda taripashcata manzhasha huañunatas manzhanaun.

57 Cunanga randi ñucanchi Señor Jesucristo huañushcamandami Yaya Diosca huañuita binsisha ushaita ñucanchima cun. Chimandami paita yapa cushihuan pagrachu nisha alabashunchi.

58 Chasna acpi shayarishcashina sinzhita quirisha mana sambayasha tucui uras Yaya Diospa tarabanata raichi llaquishca huauquiguna. Señor Jesucristohuan shuglla tucushca ashami imatas paihuhan racpihuas mana yanga tucungachu. Chitaga alita yachanguichimi.

16

Diosma cumbirana cullquimanda

1 Ñáa mana yapa charic quiriccunama yanapasha cumbirana cullquita japidamanda rimashami. Galacia llactaibi tiyac quiriccunata ñuca rimashcacuintallata cangunahuas rana manguichi.

2 Caran domingo punzhaibi caran amu Dios canda cushcamanda chicanyachisha huacaichinami. Yali ganac runaga yali cumbiranami. Ñáuca cangunahuagma pactacpi tucui ñaupa chicanyachisha huacaichishcata tandachinata ushanguichi. Chasna racpi ñuca tiyangaraushca uras chita japidamanda minishtinguichichu.

3 Ñáuca chibi pactasha canguna Diosma cumbirana cullquita japidamanda Jerusalenbi tiyac pugri quiriccunama cachashami. Cangunaga shuc (1) runata ishcaita (2) canguna muntunmanda japticpi chi cullquita apanauchun nisha. Chasnallata ñuca quillcashca ricsichina

cartata apanauchun quiric huauquigunama cungahua.

⁴ Náucahuas rinata balicpiga paiguna ñucahuau rinauchun.

Pablo pasiana uras

⁵ Ñáupapunda provincia Macedonia llactagunama pasiashcahuasha cangunahuagma shamushami.

⁶ Chasna shamusha ashca punzhagunatachari, tucui sanjuan uraspichari, cangunahuan saquirisha. Chihuasha ñuca maibis ricpi cangunaga yanapasha cushihuan cachahuanguichi.

⁷ Huashaga Dios munacpi ashca punzhagunata cangunahuan saquirisha nini. Randi cunanga timpu illacpi cangunata pasashami shuc ratullata pasianata mana munasha.

⁸ Cunanga Efeso llactaibimi saquiringarauni Pentecostes jista punzhagama.

⁹ Cai Efeso llactaibi ashca runa Diospa shimita yapa yachanata munanaupi ñuca yapa tarabana mani. Chasna agllaita ashca runaguna ñuca yachachinata mana munasha jarcachinata munanaun.

Timoteomanda, Apolosmanda

¹⁰ Timoteo cangunahuagma pactacpi cushihuan japichi pai mana manzharishca tucungahua. Paihuas ñucacuinta Diospa tarabanata raun.

¹¹ Chimanda ama pihuas paita yanga mangui nisha rimachinguichichu astahanubas paita yanapasha ñucahuagma cuti cachamunguichi. Chi

shuc quiric huauquigunahuan pariu pai shamunata chapauni.

¹² Apolosta yapa rugarani chi shuc quiriccunahuan cangunahuagma pariu pasiringui nisha randi cunan mana munarachu. Huasha pai ushashcaibi shamungami.

Alita quirisha sinzhiyaichi

¹³ Yuyarichi. Diosta sinzhita quirisha ama juchai urmaichichu. Manachu cari anguichi. Chasna asha Diospa ushaihuan sinzhiyaichi mana manzharisha.

¹⁴ Imata rashahuas tucuigunata llaquishami raichi.

Dispirishca

¹⁵ Alimi huauquiguna. Canguna yachanguichi provincia Acayaibi Estéfanascuna punda quiriccuna auta yachanguichi. Tucui uras quiriccunata yapa yanapangahua tarabasha causanaunmi.

¹⁶ Chiraicu paigunacuinta runagunata balichisha uyaichi. Llambu Señor Jesucristota sirbisha tarabac runagunata alita uyaichi.

¹⁷ Estéfanas Fortunatondi Acaicondi cangunahuagmanda caima shamushcamanda cushiyani. Canguna caruibi causasha mana ushashcamanda paiguna randi ñucanchita cushiyachinaura.

¹⁸ Ñáucanchita ahuantachishcacuinta cangunatahuas chasnallata ahuantachingaunami. Chasna rac runagunataga llaquina manguichi.

¹⁹ Asiaibi tiyac llactagunaibi causac quiriccuna cangunama saluduta cachanaun. Quiric huauqui

Aquilo pahua huarmi Prisilandi pahua huasibi tandanauc quiriccunandi Señor Jesucristohua shutibi cangunama yapa saludanagunata cachanaun.

²⁰ Tucui caibi tiyac quiric huauquiguna panigunas cangunata saludanaun. Cangunapura pariu-manda yapa llaquishcahuan saludaichi.

²¹ Ñáuca quiquin maquihuan quillcashcha saludauni Pablo sirtu quillcashcata canguna yachangahua.

²² Maican Señor Jesucristota mana llaquic runata Dios taripasha jichuchun. Señor Jesus uctalla shamuchun.

²³ Señor Jesus tucui cangunata llaquisha alita rachun nishami tapuni.

²⁴ Ñáucanchi Jesucristohuan shuglla ashcamanda tucui cangunata llaquini.
Chillata quillcani. Pablo.

**Diospa shimi
New Testament in Quichua, Northern Pastaza
(EC:qvz:Quichua, Northern Pastaza)**

copyright © 2009 Wycliffe Bible Translators, Inc.

Language: Quichua, Northern Pastaza

Translation by: Wycliffe Bible Translators, Inc.

Quichua, Northern Pastaza [qvz], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Quichua, Northern Pastaza

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

bb610827-3d94-556d-936b-ea1690b46928